

**NATIONAL ASSEMBLY OF
SEYCHELLES**

Friday 4th November, 2022

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. E bon zour nou zofisye ki pe akonpany nou e nou piblik ki pe swiv nou an deor Lasanble. Mersi pou zot prezans.

Bon ava nou par nou Biznes regilye, ki nou'n asanble ozordi, mon ti akontan pran laparol e mon espere lo lapar tou Manm e osi tou nou staff pou eksprim en temwayaz lo en personnalite Seselwaz ki'n desede e sa byensir se Kaptenn Nicole Chang-Leng, ki parey zot konnen ti vin premye pilot kalifye a o nivo dan nou lakonpanyen aryen *Air Seychelles*.

Mon krwar lakonplisman Kaptenn Chang-Leng i enn ki remarkab akoz in montre ki madanm Seselwaz i kapab pers plafon e okip bann profesyon ki

nou ti abitye asosye avek zis bann zonm.

E nou osi bezwen selebre sa latitud e sa lespri ki'n anmenn en zenn fiy pou reve e anvi pou li vin en pilot, pou sa ki reprezante koman profesyon dan nou pei. Mon alor pran sa lokazyon pou eksprim mon kondoleans pou son fanmir, ki nou tou nou konnen zot pou dan moman tristes e douler.

Me mon osi eksprim kondoleans pou tou son bann zanmi, e pou son bann koleg dan lakonpanyen Air Seychelles ki mon asire ki zot pou mank li bokou. Byensir sa lakonplisman pou reste en legzanp mon krwar pou tou nou bann zenn fiy e nou bann madanm e mon ekspekte ki nou bann madanm dan Lasanble i ava al o devan pou partaz sa santiman ki en tel lakonplisman i reste en model en legzanp pou nou Nasyon.

Alor ankor en fwa kondoleans e nou sipor pou tou ki'n konn li. Mersi. Avek sa madanm raporter nou ava apel Minis Finans e son delegasyon silvouple.

Bon, bonzour e byenveni Minis Hassan, Minis pou Finans dan Lasanble. E nou war li en loner ki ou'n ariv avek en gran delegasyon. E bann

zofisyè ki avek ou osi, byenveni dan Lasanble.

Byensir nou'n rasanble pou ekout prezantasyon *Appropriation Bill, 2022* - Ladres lo Bidze par Minis Finans Naadir Hassan. Onorab Leader Zafer Gouvernman ou pou anmenn Mosyon pou *Second Reading*?

HON BERNARD GEORGES

Bonzour Mr Speaker. Bonzour Minis avek ou delegasyon e bonzour tou mon bann koleg Onorab, bonzour tou bann dimoun ki pe swiv nou dan lakour.

Mr Speaker, san dir plis mon oule partaz ou parol bomaten lo lapar Kaptenn Chang-Leng. E avek sa 2 mo Mr Speaker anba *Order 69(2)* nou *Standing Orders*, mon *move* ki *the Appropriation Bill, 2022* i ganny lir en Dezyenm Fwa. Mersi.

MR SPEAKER

Mersi. Mon a ganny segonnman silvouple? Onorab Henrie.

HON GERVAIS HENRIE

Mersi Mr Speaker. Bonzour tou dimoun. Mr Speaker, *Motion* is *seconded*.

MR SPEAKER

Mersi Onorab. Minis prezan nou annord pou ekout ou prezantasyon.

MINISTER NAADIR HASSAN

Mersi Mr Speaker.

Mr Speaker,
Onorab *Leader* Lopoziyon,
Onorab *Leader* pour Zafer Gouvernman,
Tou Manm Onorab,
Ser e frer Pep Seselwa.,
Bonzour.

Lentrodiksyon

Mr Speaker avan mon koman mon Diskour 2023, mon le zwenn ek Lasanble pou osi eksprim mon kondoleans avek manm fanmir Kaptenn Nicole Chang-Leng, ki malerezman in kit nou yer. Kaptenn Chang-Leng ti en legzanp pou nou popilasyon ki mon kapab dekri li koman en Ero ki trankilman ti pe ouver laport pou bokou nou bann zenn fiy, pou montre zot ki napa nanryen dan zot semen ki kapab anpes zot atenn zot lanbisyon e rev.

Kaptenn Chang-Leng ti en vre zanfan Sesel. An menm tan Mr Speaker mon oule osi rann omaz enn nou travayer Minister Finans, Diane Agathine ki ti kit nou pli boner sa lannen. Diane ti en *staff* egzampler, touzour

souriyan, ki'n osi kontribye osi dan sa Bidze ki mon pe al prezante ozordi. Mr Speaker mon rann omaz sa 2 madanm Seselwa.

Mr Speaker ozordi i fer trwazyenm bidze ki mon vin prezant ek Lasanble Nasyonal. Bidze 2023, i reprezant en kontinyasyon sa de bidze presedan. Akoz mon dir en Bidze kontinyasyon?

Dan mon premye diskour Bidze, dan en fason fran e onnet mon ti prezant nou sityasyon bidzeter e ekonomik pei ki sa ladministrasyon ti'n erite. Mon ti eksplike ki nou sityasyon ti kritik e menm ki nou ti o bor en presipis. Fas avek en tel sityasyon, mon ti donn en plan kler ki sa ladministrasyon ti pou bezwen fer, pou tir nou dan sa sityasyon ki nou ti ete, e refer nou lekonomi.

Dan sa de diskour mon ti met devan de prensip fondamantal.

- 1) Premyerman nou ti pou bezwen stabiliz nou sityasyon bidzeter e nou sityasyon ekonomik
- 2) Se refer nou lekonomi lo en baz pli for e pli rezilyan

Mr Speaker, konman en Gouvernman responsab, ki pa per pou pran bann desizyon

difisil pou benefis nou pei, e kantmenm serten kritik, nou'n mentenir sa disiplin e ozordi nou war rezilta annan en plan kler, responsab, ki pe ganny delivre par bann dirizan for e desiziv. Nou Gouvernman pe rod en sanzman latitid kot travay dir ek responsabilite i bann valer ek prensip ki ganny enkilke dan nou sosyete, pou ed nou rekolte bann benefis.

Mr Speaker, ozordi nou kapab anonse ki nou'n reisi sirmont pli gro kriz ekonomik ki sa pei in deza fer fas avek dan son listwar. Alor, Mr, mon oule dir mersi tou Seselwa ki pandan sa 2an, nou'n demann zot pou fer bokou sakrifis e annan pasyans, an atandan ki nou'n konsantre lo stabilizasyon e relansman nou lekonomi.

(APPLAUSE)

MINISTER NAADIR HASSAN

Mersi pour zot konfyans ki zot in mete dan sa Gouvernman pou diriz nou pei dan sa moman difisil.

Mr Speaker, avan nou al pli lwen, mon oule donn enn de statistik, pou ilistre sa transformasyon ki'n arive pandan sa dernyen 2 an.

An 2020, nou ti fer en defisit primer fiskal 15.1 pousan e nou det ti ariv 92.2

poursan prodwir domestik brit. Roupri konpare ek Dolar ti'n ariv R21.80sou, e dan kont Gouvernman ti annan selman R 14.9milyon; krwasans ekonomik ti kontrakte par 7.7 poursan e an 2021 to lenflasyon ti'n ariv 9.8 poursan.

Mr Speaker, ozordi nou defisit primer fiskal pou 2022, i ekspekte ariv selman 1.1 poursan prodwir domestik brit. Nou det i ekspekte ariv 67.9 poursan prodwir domestik brit. To lenflasyon in desann pou ariv 3 poursan. E to Roupri kont Dolar in ariv R14.32, sa ti lo konmansman Novanm.

Mr Speaker, sa bann statistik i montre klerman rezilta ki nou Gouvernman in reisi fer dan mwens ki 2an. Sa reisit i ganny rekonnèt lo nivo enternasyonal kot bokou i servi Sesel koman legzanp, ki mannyer pou zer en lekonomi dan en moman kot i annan en kriz mondyal, sirtou ler bokou pei pe war li difisil pou zer sa sityasyon.

Mr Speaker, Bidze 2023, i enn ki pou distribye rezilta sa bon travay avek nou pep e osi fer posibil ki Gouvernman i kapab fer plis lenvestisman dan lenfrastruktir pour byennet sosyal popilasyon e ki a agrandi nou lekonomi.

Pli tar dan Bidze, mon a donn detay lo revè striktir saler dan sektè piblik e osi lezot bann depans dan sektè lasante, ledikasyon, lakaz, diferan lenfrastruktir semen, bann lenfrastruktir dan distrik, e lezot ankor.

Sa Bidze i osi entrodwir plizyer linisyativ ki pou ed Seselwa amelyor zot lavi e osi ed biznes progrese. Me parey mon'n toultan met lanfaz lo la, konman en Gouvernman responsab nou bezwen asire ki nou Bidze i balanse e nou mentenir stabilite makroekonomik. Nou pa pou kapab pran bann move desizyon popilis, ki pou retourn nou ankor dan sa presipis ki nou ti'n erite. Avek sa, ankor mon remerci pep seselwa pou met zot konfyans dan en Gouvernman ki responsab.

Avek sa, pou annan serten bann nouvo mezir fiskal, ki pou ed Gouvernman anmas reveni pou reenvestir dan son pep. Nou'n osi asire ki bann mezir fiskal pou reveni ki'n ganny pran pa afekte nou dimoun.

Mr Speaker, i ankor enportan pou note ki sityasyon lo nivo mondyal i ankor ranpli ek lensertitid e risk. Sesel i ankor en pei ki vilnerab ek bann sok eksteryer. Sa i donn nou plis rezon pou kontinyen

azir dan en fason responsab e pridan. Avek *Covid* ki ankor la, avek reperkisyon lager an Ikrenn e osi bann lezot tansyon politik atraver lemond, i nesese ki nou swiv sa bann devlopman de tre pre e aziste nou bann Polisi si i nesese.

Devlopman lo nivo mondyal

Mr Speaker, lo nivo mondyal, lekonomi pe fer fas avek bann defi ki ankor pe anmenn bokou lensertitid e risk dan bokou parti lemond. Previzyon pour lekonomi mondyal pe ganny bokou afekte avek to lenflasyon ki o, bann kondisyon finansyel ki pli dezavantaze, lager Ikrenn, e pandemik *Covid-19* ki ankor pe persiste.

Polisi monneter e fiskal dan bokou pei pe esey redwir demann pour komodite avek bi pou redwir to lenflasyon. Me malerezman dan bokou pei, krwasans in ariv pli ba ouswa dan negatif. Previzyon Fon Monneter Enternasyonal (*IMF*) an Oktob 2022, in prozekte en krwasans mondyal pli feb sorti 6poursan an 2021 pou ariv 3.2 poursan an 2022 e 2.7poursan an 2023. Sa prediksyon lo lekonomi mondyal i reste ase ba, konpare avek en mwayenn 3.6 poursan pandan sa dernyen 20 an. Devlopman dan

lekonomi mondyal pour lavenir, i reste otour bann faktor kle ki tourn ver evolisyon dan Polisi Monneter, la fason ki lager Ikrenn i kontinyen e lenpak ki pandemik *Covid-19* pou annan lo distribisyon komodite.

Revi lo Performans Ekonomik 2022 e Konteks Lekonomi pour 2023

Mr Speaker, lo kote Sesel, prozeksyon lo performans ekonomik pour lannen 2022 i reste tre pozitiv, apre en rekiperasyon ki ti konmanse an 2021. Sa lannen, krwasans prodwi domestik brit (*GDP*) i prozekte pour ariv 10.6poursan, e sa pe ganny siporte prensipalman par lendistri tourizm.

Sif lo kantite viziter ki'n ariv Sesel konpare avek menm letan dan lannen 2021 in plis ki double e en estimasyon 75poursan ogmantasyon pour lannen 2022 i ekspekte. Sa in anmenn en krwasans pli remarkab dan bann sektor ki relye ek tourizm, e osi en lenpak pozitiv lo aktivite lekonomi dan mazorite sektor prodiktiv.

Aksyon Gouvernman pou re-ouver nou pei, in enn ki'n pozitiv e responsab, aköz dan mwens ki 2 an, nou lendistri tourizm in preski dir retourn lo

son nivo normal, avan pandemik *Covid-19*.

Sekter lenformasyon ek telekominikasyon i reste favorab e nou pe prozekte en krwasans 10 poursan pandan 2022. Dan sekter finansyel e lasirans nou pe prozekte en krwasans 2 poursan. Nou pe osi ekspekte en krwasans 1 poursan dan sekter lagrikiltir. Dan sekter lapas nou pe estimen ki prodiksyon pou kontrakte par 8 poursan.

Mr Speaker, pour lannen 2023, nou pe prozekte prodwi domestik brit, pou agrandi par 5.4 poursan e sa i pli o konpare avek bann prozeksyon inisyal. Sa prozeksyon pour 2023, i anliny avek en pli gran krwasans an 2022. Ankor enn fwa, sekter tourizm i reste konman sa sekter ki anmenn plis aktivite dan lekonomi, avek larive viziter ki kontinyen ogmante.

Bann aktivite dan sekter tourizm, parey servis akomodasyon e servis administrativ pe prozekte pou agrandi par 15poursan e 16 poursan respektivman. Krwasans an 2023, pou osi ganny siporte par en bon performans dan sekter lenformasyon ek telekominikasyon avek en krwasans 5poursan e osi en

lagrandisman dan aktivite prodiksyon par 3poursan, partikilyerman dan domenn lapas.

Sesel i ekspekte lo son semen pou rekipere avek en krwasans prodwi domestik brit reel, ki nou pe prozekte pou ariv 5poursan an mwayen term. Pandan premye sis mwan sa lannen, to lenflasyon in redwir konpare avek en to ki ti O, ver lafen 2021. Nou ekspekte to lenflasyon anyel pou ariv 3.04 poursan a lafen 2022.

An 2022, stabilite dan to lesanz, in kapab redwir lenpak lo to lenflasyon, anvi, ki konpare avek 2020 e konmansman 2021, ler to lesanz ti'n ariv ziska 22 Roupri pour en Dolar Ameriken, ozordi, lafen mwan Oktob, an mwayenn en dolar i mwens ki 15 Roupri. Ankor enn fwa, Mr Speaker, pri lavi ti pou bokou pli o, si Gouvernman pa ti'n pran bann aksyon responsab pour anmenn stabilite dan nou lekonomi.

Me, par kont nou pe prozekte en to lenflasyon anyel 4.2poursan pour lannen 2023, ki en ogmantasyon, aköz nou ekspekte ki pri komodite lo marse enternasyonal pou kontinyen reste o, an vi sa kantite lensertitid ki reste lo nivo mondyal: tel ki lenpak

direk ki pri karbiran enternasyonal i annan lo pri komodite e sa konfli ant Ikrenn ek Larisi.

Lo kote nou det, nou reste angaze pou redwir det Gouvernman pou ariv 5 poursan an 2026 sorti 92.2poursan prodwi domestik brit 2020, e ziska prezan nou ankor lo target.

Avek lasistans bann partener enternasyonal, Sesel in benefisye bann kondisyon det pli favorab an term repeyman pli lonterm e osi lentere pli ba. Sa i form par plan stratezik Gouvernman, pou asire ki son det i reste soutenab e avek bann kondisyon pli favorab.

Parmi son stratezi, Gouvernman in osi konmans servi plis 'Treasury Bonds' konman en lenstriman det domestik. En total 1.3 bilyon Roupri in ganny ofer an traver *bond* sa lannen. Tousala in ed Gouvernman pou ogmant matirite son profil det par apepre en an e asir en det pei ki soutenab. Sa in plas nou lo en bon semen pou redwir nou det pou vin apepre 50poursan prodwi domestik brit, par 2026.

Mr Speaker, sa bon performans ekonomik ki nou pei pe pas atraver, i enn ki'n enpresyon bokou nou bann

partener enternasyonal. A sak fwa ki *IMF* i fer son revi, i dir ki mannyer sa relansman ekonomik i enn ki for e enpresyonnan. Tou resaman, reprezantan Labank Devlopman pour Komers (*TDB*) in osi repet menm keksoz. In dir ki konpare avek bokou pei, Sesel pe fer tre byen.

Sa konfyans ki kominote enternasyonal i annan dan lekonomi Sesel, in osi demontre par revi *Fitch* ki'n konplete ver lafen Oktob 2022. Sa revi in amelyor ran Sesel pou ariv *BB-*sorti *B+* avek en previzyon ki stab.

Sekter Monneter

Mr Speaker, pandan 2022, Labank Santral in mentenir en Polisi Monneter akomodativ pour siport lekonomi domestik, ki pe fer fas avek bann devlopman eksteryer, tel ki pri komodite ki reste ase eleve, e bann defi lo nivo prodiksyon ek transportasyon. Anliny avek sa Polisi Monneter akomodativ, to lentere lo marse domestik in reste ase ba. An mwayenn, to lentere lo bann depozit ti 1.49poursan an Septanm 2022, e 9.15poursan lo bann fasilite kredi.

An sa ki konsern '*Treasury-bills*', to lentere ti

0.88poursan, 1.48poursan e 2.18 poursan lo bann fasilite 91-zour, 182-zour e 365-zour, respektivman. An zeneral, in annan en logmantasyon dan lakantite kredi an term Roupï, ki'n al anver sekte prive pandan 2022. Sa i reflekte en amelyorasyon dan aktivite ekonomik e en lanvironnman pli favorab pour bann biznes.

An Septanm 2022, lakantite kredi in ogmant par 11.3poursan konpare avek Septanm 2021. Sipor kontinyel i neser pour ankouraz plis aktivite ekonomik e asire ki nou lekonomi i agrandi dan en fason soutenab. Nou konsyan toudmenm, ki si nivo pri komodite lo marse enternasyonal i reste eleve, sa pou anmenn serten presyon lo pri an zeneral dan marse domestik. Lenflasyon

An rezilta sa apresyasyon dan valer Roupï an 2021, nivo lenflasyon in reste ba pandan premye lanmwatye lannen 2022. Toudmenm, anvi sa konfli ant Larisi ek Ikrenn ki'n enpakte pri komodite ek karbiran lo marse enternasyonal, in annan en logmantasyon dan to lenflasyon lo nivo nasyonal, apartir Zilyet 2022. Konpare avek Septanm 2021, to lenflasyon ti 3.0

poursan an Septanm sa lannen. Lo en baz douz mwan, to lenflasyon ti 4.1 poursan pandan sa menm peryod.

Sekte eksteryer

Bann estimasyon preliminer i montre ki malgre ki kont pei i reste an defisit an 2022, in annan en amelyorasyon konpare ek 2021, kot in sorti 11 poursan pou ariv 7.2poursan nou prodwi domestik brit. Sa ti an rezilta performans pozitiv dan sekte tourizm, ki'n ede pour anmenn plis reveni an deviz etranzer, konpare ek lannen pase. Lenvestisman sorti aletranze (*FDI*), ki estimen a en valer apepre 230milyon Dolar ameriken an 2022, in ede siport aktivite ekonomik.

Plizyer proze ki ti'n ganny retar aköz pandemi *Covid-19*, ti rekonmanse e an plis, in annan bann nouvo proze, prensipalman dan sekte tourizm ki pe ganny enplimante sa lannen. Anliny avek prozeksyon, kont pei pou amelyore pour ariv en defisit 5.7poursan nou prodwi domestik brit, baze lo performans pozitiv dan sekte tourizm ki ekspekte kontinyen an 2023.

Revi lo Performans Fiskal 2022

Mr Speaker, Gouvernman in prozekte pou fini lannen 2022 avek en balans defisit primer 1.1 pousan prodwi domestik brit. Sa i konparab avek Bidze inisyal, ki nou ti pe prozekte en balans defisit primer 0.8pousan prodwi domestik brit. Sa pti ogmantasyon i aköz nou'n kapab negosye avek Fon Monnetter Enternasyonal, pour nou ganny en pe lespas fiskal, pou enplimant sa bann mezir tanporer pou siport bann ki saler i pli ba an vi pri komodite ki o. Sa bann mezir ti ganny entrodwir an Zilyet.

Anba reveni total taks e '*non tax*', nou pe prevwar en ogmantasyon R 107.5 milyon konpare avek bidze inisyal. Par kont, letan nou regard reveni taks lo li menm, i annan en rediksyon R76 milyon konpare avek Bidze orizinal 2022.

Bann reveni taks ki nou'n prevwar en ogmantasyon i prensipalman dan koleksyon; VAT, en ogmantasyon par R 99.6milyon e sa i relye avek krwasans dan sekter tourizm. Prozeksyon dan taks biznes in ogmante par R 8.2milyon e osi nou ankor pe kolekte CSR taks, apre bann odit ki'n ganny fer, kot en sonm R 7.1 milyon in ganny prozekte.

Nou'n osi vwar en rediksyon dan serten koleksyon taks ki ti'n ganny prozekte inisyalman. E sa i prensipalman dan taks lo saler e '*excise*' taks. Nou prozeksyon reveni lo taks lo saler in desann par R 62.6milyon e sa i aköz nou revii Bidze 2022 ki Lasanble Nasyonal in aprouve, nou'n fer en rediksyon bidzeter dan saler total Gouvernman, aköz serten Minister pa'n kapab anploy plis travayer parey nou ti'n prozekte.

'*Excise*' taks in desann par R 96.9 milyon e sa i prensipalman koleksyon reveni taks lo bann prodwi karbiran, prodiksyon lalkol e prodwi taba lokalman.

Anba koleksyon '*non tax*' nou'n vwar en amelyorasyon par R 184.3milyon e sa i aköz Gouvernman in kolekte plis '*dividends*' avek son bann lantrepriz piblik, konpare avek son prozeksyon inisyal.

Mr Speaker, parey nou ti prezante avek Lasanble Nasyonal pandan revii Bidze, nou ti fer en demann R 472.8milyon Bidze Siplemanter e en rediksyon dan depans pour en sonm R887.5 milyon. Alors Mr Speaker, depans Bidze 2022 in annan en rediksyon R 414.6 milyon.

Bidze 2023 e Performans Fiskal Mwayen Term

Mr Speaker, pour lannen fiskal 2023, Gouvernman pe propoz en depans R 10,495,149,665. Sa i reprezant en ogmantasyon 4poursan letan ou konpar avek ‘*Appropriation Act*’ 2022, ki ti R 10,091,651,146. Nou pe osi prozekte pou kolekte R 10.7bilyon reveni ek bann don.

Pour lannen 2023, Gouvernman pe prozekte en balans sirplis fiskal primer R 330.3 milyon ouswa 1.1poursan prodwi domestik brit. Dan mwayen term, nou pe prozekte en balans sirplis fiskal primer 2.2poursan prodwi domestik brit an 2024 e 3.5poursan prodwi domestik brit an 2025. Sa i pou ed nou atenn nou lobzektif pour anmenn det Gouvernman anviron 50 poursan prodwi domestik brit par 2026.

Koleksyon Reveni pour Lannen 2023

Mr Speaker, en sonm total R 10.7 bilyon pe ganny prozekte pour reveni ek bann don pour lannen 2023. Ladan, 86poursan sa prozeksyon i koleksyon taks ki ekivalan R9.2bilyon. Sa i reprezant R1.4 bilyon an plis konpare avek

Bidze revize an 2022. Sa ogmantasyon i baze lo performans ekonomik ki’n amelyore, ki vedir nou pou kolekte apepre R900milyon an term taks adisyannel, e osi baze lo bann nouvo Polisi fiskal ki mon pou anonse pli tar, e sa nou pou kolekte R 499.5milyon reveni adisyannel an 2023.

Ogmantasyon reveni anba taks lo saler, i R124milyon anplis, konpare avek koleksyon an 2022 pour en total R1.1bilyon. Sa i prensipalman relye avek ogmantasyon saler an 2023. Koleksyon reveni anba ‘*Excise*’ taks e ‘*VAT*’ ki’n ogmante par R233.0milyon e R290milyon respektivman i prensipalman asosye avek krwasans dan sekter tourizm konpare avek 2022.

Lezot reveni ki ganny klasifye konman ‘*non tax*’ pour lannen 2023, en prozeksyon R1.08 bilyon konpare avek R 1.24bilyon an 2022. Sa in redwir par R165milyon e sa rediksyon pe ganny anrezistre anba ‘*dividends*’ sorti kot bann lantrepriz piblik, ki’n redwir sorti R747.3milyon pou ariv R 547.1milyon.

Dividend ki noun kolekte avek Nouvobanq ki’n pey Gouvernman an 2022, i kouver peryod 2020 e 2021, e an vi sa, peyman an 2023, pa pou parey.

Gouvernman in osi ganny en 'dividend' eksepsyonnel avek 'Seychelles Cable System Company', me nou pa pou ganny 'dividend' avek sa lakonpanyen pour 2022. Gouvernman in osi kolekte 'dividend' ki relye avek kont finansyel *Indian Ocean Tuna Ltd (IOT)* pour lannen 2020 e 2021 an 2022.

Koleksyon reveni an term don pe reprezant 1.3 pousan GDP an 2023 ki ekivalan R402.6milyon.

Konteks Bidze 2023

Mr Speaker, lobzektif prensipal Bidze 2023, se pour nou distribye en pe rezilta sa travay dir e sa latitud disiplinen ki Seselwa e Gouvernman in obzerve, pour sa de dernyen lannen. Dezyenmman investir plis dan lenfrastruktir, e finalman pour nou osi akonplir en sirplis bidzeter an mwayen term e sa i ava ed nou pou asire ki det Gouvernman i reste soutenab.

Sa konsolidasyon fiskal tre anbisye ki Gouvernman ti konmanse depi 2021, i lo bon semen e sa in kontribye pour ki det Gouvernman i sorti 92.2pousan prodwi domestik brit, ver lafen 2020 e prozekte

pou ariv 64.6pousan ver la fen 2023.

Mr Speaker, Gouvernman pe kontinyen son travay pou enplimant Devlopman Stratezi Nasyonal pou kouver bann sektè priyorite, konm swivan;

1. En Servis Piblik pli modern e efikas
2. Nou azanda transformasyon lekonomi i kouver:
 - a. Tourizm
 - b. Lagrikiltir
 - c. Lapes e lekonomi ble
 - d. Lekonomi nimerik e
 - e. Sektè finansyel

3. Modernizasyon e efikasite dan sistenm Lasante
4. Promouvwar Lord e Lape
5. En sistenm Ledikasyon pli modern ki alinyen avek bezwen pei pour lavenir e
6. Soutenabilite nou lanvironnman e plis rezilyans kont sanzman klima

Sa bann sektè priyorite i lakle pou anmenn sa sinerzi avek Bidze mwayen term e bann stratezi dan bann portfolyo administrasyon.

An plis ki sa sis sektè priyoriter, Gouvernman pou kontinyen investir dan bann program sosyal, avek bi donn sipor tou kous nou popilasyon.

Labaz Depans Gouvernman

Mr Speaker, labaz depans Gouvernman an 2023 i reste enn ki responsab, pridan e disiplin. Lanfaz safwasi pe mete lo depans dan nouvo lenfrastriktir oubyen bann ki'n ganny neglize pandan plizyer lannen, e zot in avarye, e osi ogmantasyon saler dan servis piblik.

Pli gro sonm dan Bidze 2023, i pour en total R 3.62bilyon ki pe ganny prozekte anba byen e servis. Sa, i reprezant 11.8poursan prodwi domestik brit konpare avek 120poursan prodwi domestik brit an 2022. Sa prozeksyon i osi en ogmantasyon R293.0 milyon konpare ek Bidze revize an 2022, ki pou en sonm R 3.33bilyon.

Par kont, pli gran ogmantasyon i pou en total bidze R1.4bilyon ki pe ganny prozekte pour lannen 2023, dan program lenvestisman kapital ki reprezant 4.6 poursan prodwi domestik brit. Sa i reprezant en ogmantasyon R 608.9milyon ouwa 76poursan letan ou konpar avek bidze revize an 2022.

Sa i reflekte priyorite Gouvernman pou met an plas nouvo lenfrastriktir pou ede agrandi nou lekonomi e byennet nou pep. I osi annan en sonm signifikan pou repar

bokou lenfrastriktir ki pa'n ganny mentenir pandan plizyer lannen.

Reminerasyon e Saler

Mr Speaker, pandan sa dernyen 2an, kot sityasyon ti vreman difisil, nou'n demann travayer pou annan pasyans, travay dir, e priyoritiz zot depans, akoz Gouvernman pann kapab donn en ogmantasyon saler. Me in kapab omwen garanti saler tou travayer sektor piblik. Nou rekonnèt ki i pann fasil ditou, sirtou avek sa kriz mondyal kot pri komodite in vreman monte. Pour zot pasyans mon dir zot en gran mersi. Aprezan, 2an pli tar, an 2023, sityasyon in amelyore, gras a bann desizyon responsab, disiplin e desiziv ki sa Gouvernman in pran.

Dan Bidze 2023, nou pe osi propoz en Bidze R3.44bilyon pour reminerasyon ek saler dan servis piblik. Sa i reprezant 11. poursan nou prodwi domestik brit, konpare avek R3.0 bilyon an 2022. Nou lobzektif i reste pour nou mentenir bidze reminerasyon e saler an mwayen term a 11 poursan prodwi domestik brit.

Pour lannen 2023, nou prozeksyon reminerasyon e saler in ogmant par R428.3

milyon, ouswa 14poursan letan ou konpar ek Bidze 2022. Parey mon ti anonse dan diskour Bidze 2022, Gouvernman ti pe travay lo en nouvo striktir saler dan servis piblik. Dan sa premye faz sa legzersis, sa nouvo striktir saler in konsolid sa bann alawenns swivan dan saler de baz;

5poursan
'*supplementation allowance*' ki ti ganny entrodwir an 2019

Marketable skills
alawenns

Graduate alawenns ek
Performance alawenns

'*Inducement*' ek '*long service*' alawenns pa enkli dan sa konsolidasyon.

Pour '*inducement*' alawenns, sa i neserer pou pran an kont bann fakter ki pa ganny kouver anba sistenm evalyasyon travay;- par egzanp mankman konpetans dan marse lanplwa ki fer en kalifikasyon *pli* '*marketable*' konpare avek en lot. Gouvernman pou osi fer en resers lo marse lanplwa baze lo bann pozisyon ki egziste dan Gouvernman konpare avek sektor prive.

Kant a '*long service*' alawenns, nou'n pran kont son kompleksite e lenpak i kapab annan lo striktir saler. Gouvernman in idantifye ki si i konsolid '*long service*' alawenns

dan sa nouvo grid saler, i kapab ariv bann senaryo ki sa travayer ki dan en pli ba pozisyon, son saler i kapab pli o ki sa travayer ki dan en pozisyon pli eleve. Alors sa i kapab anmenn plis fristrasyon ant bann travayer.

Mr Speaker, dezyenm eleman dan sa legzersis, se en ogmantasyon saler dan servis piblik. Apre ki nou'n konsolid sa bann alawenns ansanm, travayer sektor piblik pou osi ganny en ogmantasyon an mwayenn 10poursan.

(APPLAUSE)

MINISTER NAADIR HASSAN

Dan nou analiz, ogmantasyon pli ba pour R 1,000. Avek sa konsolidasyon ek ogmantasyon 10poursan, saler pli ba dan Gouvernman pou sorti R 5,485 pou ariv R 7,343.

(APPLAUSE)

MINISTER NAADIR HASSAN

Pou asir klarite, mon ava donn de legzanp ki mannyer sa konsolidasyon alawenns ek sa ogmantasyon 10poursan lo saler pou marse. En drayver ki konmela pe ganny en saler debaz R 6,325 avek en 5poursan '*supplementation*' alawenns R 316.25, ki fer en total R 6,641.25 letan ou

konsolid son saler, e avek sa ogmantasyon, son nouvo saler debaz pou ariv R 7,641.25.

En *graduate* ki konmela pe ganny en saler de baz ki R9,887 avek en 5poursan '*supplementation*' alawenns ki R494.25, en '*marketable skills*' alawenns R1,400, en '*graduate*' alawenns R5,000, ki fer en total R16,781.35, letan ou konsolid son saler avek sa ogmantasyon, son nouvo saler debaz pou ariv R18,662.43.

Trwazyenm eleman sa travay, i ki Gouvernman in plas sak endividi avek son nouvo saler lo sa nouvo grid saler ki annan selman 12 '*band*' e ki annan 15 '*step*' pour sak '*band*'. Sa nouvo grid saler in fini ganny finalize e pou ganny eksplike avek travayer, dan bann zour ki pe vini.

Savedir Mr Speaker, zis pou fer kler, anba sa revi saler, premyerman, nou'n konsolid 4 alawenns dan saler de baz, e dezyenmman, nou'n donn en ogmantasyon saler an mwayenn 10poursan, lo sa saler ki'n ganny konsolide. Mon swete sa i kler.

Mr Speaker, dan sa revi, Gouvernman in osi deside pour retir saler bann lapwentman konstitisyonnèl avek sa ki pou servis piblik. Saler servis piblik pou ankadre dan en polisi ki

Biro Servis Piblik pou administre.

Kant a saler bann lapwentman konstitisyonnèl, Gouvernman pou apwent en komite endepandan pou revwar zot saler prenan kont, tou bann benefis ki bann lapwentman konstitisyonnèl pe gannyen ozordi. Sa legzersis pou ganny fer dan en fason endepandan, transparan e obzektiv.

Mr Speaker, sa ogmantasyon dan saler servis piblik pou pran lefe le 1 Avril 2023 e pe kout R171.9 milyon an 2023 ki reprezant 0.6 poursan prodwi domestik brit. An 2023, Biro Servis Piblik ansanm avek bann zofisyè resours imen dan Gouvernman, pou fer en revi lo skim travay ki annan dan servis piblik.

Mr Speaker, nou rekonnet ki sa revi saler pe viz zis travayer sekter piblik. Pour bann travayer sekter prive, mon anvi fer en lapel avek zot anplwayer pou zot osi evalye e analize si zot kapab donn en ogmantasyon zot travayer. Depi 2021, ler pei in reouver, lekonomi Sesel in relanse e aktivite ekonomik pe kontinyelman agrandi, alor mon swete ki zot rekonpans zot travayer, an vi sa bon performans lekonomi ki nou pe pas atraver.

Peyman Trezyenm Mwan baze lo performans

Mr Speaker, anvi sa bon performans ekonomik ki nou pe eksperyans, nou'n osi fer provizyon pour peyman en trezyenm mwan, baze byensir lo performans sak travayer. Pour peyman trezyenm mwan, Gouvernman in met en alokasyon R 114.19milyon. Peyman trezyenm mwan pour 2022 pou ganny fer milye Zanvye 2023. En sonm R143.4 milyon in ganny prozekte an 2024 pour peyman trezyenm mwan, anvi lenpak ogmantasyon saler an 2023.

Mr Speaker, bann endividi ki pe travay anba kad '*non-core services*' parey '*Sensitive Security*' ki anploye anba lapolis, '*Vessel Protection*' e bann travayer ki travay avek bann Manm Lasanble Nasyonal, ki annan en kontra avek Lasanble Nasyonal pou osi ganny peye en trezyenm mwan an Zanvye 2023 e en sonm R1.7 milyon in ganny prozekte. Zot osi pou benefisyè ogmantasyon saler e en sonm R2.1milyon in ganny prozekte.

Lo kote bann '*Home Carers*', Gouvernman in osi met en provizyon R 21.0milyon pour

peyman trezyenm mwan an Zanvye 2023.

Bann '*Home Carers*' pou kontinyen benefisyè avek sa R500 par mwan ki zot pe gannyen depi Zilyet 2022 e sa pou kout R15.75 milyon an 2023. Pour bann travayer '*Cleaners Corporative*', en sonm R5.9milyon e R4milyon in ganny prozekte pour peyman trezyenm mwan, an Zanvye 2023 e zot, zot pou osi benefisyè avek sa ogmantasyon saler.

Depans Enprevi (*Contingency*)

Mr Speaker, pour lannen 2023, nou pe met en alokasyon R50milyon pour bann depans enprevi. Gouvernman pe finaliz bann dokiman avek Biro Prokirer Zeneral, pou pey konpansasyon ki konsern polisyon stasyon elektrisite Baie Ste Anne Praslin. Nou ekspekte peyman pou fer boner 2023. Nou'n osi fer provizyon pour konpansasyon ki relye avek '*Fungus*' pour Minister Lasante e Minister Ledikasyon.

Peyman pour dezyenm faz konpansasyon pour bann ka polisyon delo Lanmizer pou ganny peye an 2024. Pour tou bann ki'n ganny afekte avek sa bann sityasyon, mon profite pou dir zot en gran mersi pour zot pasyans. Mon oule dir avek

zot, ki si nou ti'n kapab pey zot pli boner, nou ti pou'n fer li. Malerezman nou sityasyon ekonomik pandan sa dernyen 2an, pa ti'n permet. Kant a bann dimoun Lanmizer, mon fer en lapel avek zot, pou annan ankor en pti pe pasyans.

Depans dan bann sekter priyoter

Mr Speaker, Gouvernman pe priyotiz son depans, kot bann sekter kle in ganny idantifye, dapre nou Plan Stratezik Devlopman Nasyonal. I enportan ki depans Gouvernman i ganny byen targete, kot ava annan plis benefis pour nou pep, anmenn plis krwasans ekonomik e asir nou lavenir.

Sekter Lasante

Mr Speaker, lasante nou pep i reste en priyote pour sa Gouvernman. En Nasyon an bonn sante i enn ki prodiktiv pour nou pei. Nou sistenm lasante pe fer fas avek bokou defi, akoz an grann parti akoz nou stil lavi. Pour lannen 2023, Gouvernman pe fer en letid detaye, pou reform nou sistenm lasante, pou asire ki i vin pli efektiv e delivre en servis pli a la oter pour nou popilasyon.

Nou pe propoz kreasyon de nouvo fonksyon dan sa Minister; premyerman enn, ava asir '*quality control*' dan bann servis ki Lazans Lasante i donn bann pasyan, e en lot pou en servis relasyon piblik ki ava an kontak direkteman avek manm piblik, pou adres zot konsern lo kote servis ki zot in gannyen.

Mr Speaker, sekter lasante ozordi pe kout Gouvernman R1.38bilyon ki reprezant 13 pousan Bidze total pei. Dan Bidze 2023, bann pli gro depans dan Lazans Swen Lasante i konm swivan:

- Latizann - R70.4milyon
- Tretman dyaliz - R76milyon
- Provizyon materyo medikal - R98.1milyon
- Provizyon manze pour bann pasyan - R27.2 milyon
- Tretman medikal spesyalize - R 70 milyon en sonm R 10milyon pe osi ganny bidzete anba Lotorite Lasante Piblik, pour bann lekipman e provizyon ki bezwen dan laboratwar ki relye avek pandemik *Covid-19*.

Mr Speaker, apard sa bann gro depans ki relye direkteman avek tretman, an 2023 pou osi annan bokou lenvestisman dan lenfrastruktir lasante dan pei, en Bidze total R118.8milyon in ganny

prozekte pou sekter Lasante pou finans serten gro proze tel ki:

- i. Kontinyasyon proze 'Health Information System' – R27.13milyon
- ii. Kontinyasyon proze lopital Ladig – R 40milyon ki pe ganny finance par en don avek Emirat Arab Ini
- iii. Konstriksyon nouvo sant lasante Belazar – R8.5 milyon e
- iv. Renovasyon diferan lenfrastruktir lasante – R25.2 milyon

An plis ki bann proze renovasyon dan bann diferan lenfrastruktir lasante ki'n ganny negligez dan lefase, Gouvernman i osi rekonnèt ki leta serten lenfrastruktir i fer ki i pa fer sans finansyelman pou depans larzan dan zot renovasyon.

An vi sa, Gouvernman in osi enkli dan Bidze mwayen term en prozeksyon R540.1milyon ki pou al anver konstriksyon en nouvo fasilite lopital. Sa nouvo fasilite pou enn ki modern, e ki pou ofer tretman spesyalize parey: younit swen entansiv, aksidan e

servis dirzans ek lasanm loperasyon.

Mr Speaker, zis pou fer rapel, ki an Zilyet sa lannen, Gouvernman ti retir sa fre R25 ki pasyan ti pe peye pour preskripsyon latizann, pandan revi milye lannen. E pandan revi milye lannen, Gouvernman in osi met en nouvo alokasyon R50milyon pou aste en nouvo masin *Magnetic Reasonance Imaging (MRI)*. Mr Speaker, parey zot kapab konstata Gouvernman pe fer en kantite lenvestisman finansyel dan nou sistenm lasante, me eski zis finansman ki pou ede amelyor sa kalite servis ki pasyan pe rode?

Sa i en kestyon enportan aköz, apard finans, nou bezwen asire ki travayer sa Minister i osi pe donn pasyan en bon servis e ki osi nou rod fason pou depans dan en fason pli efikas, par elimin gaspiyaz, san ki byensir nou konpromiz nivo lasante ki pasyan pe resevwar. Avek siport Labank Mondyal, Gouvernman pou konplet en revi depans sekter lasante, par lafen premye kar 2023.

Sa revi, ava ed Gouvernman pou adres bann defayans dan prosedir depans e anmenn plis efikasite dan striktir prokirman, ki ganny fer dan byen e servis dan sa sekter.

I pour sa rezon, ki an 2023, nou pe al konmans en travay pou evalye loperasyon sa Minister avek bi, amelyor servis, anmenn plis efikasite, redwir gaspiyaz e ogmant nivo satisfaksyon bann piblik.

Sekter Ledikasyon

Mr Speaker, si i annan en sekter dan pei ki kle dan sa transformasyon ekonomik ek sosyal ki nou pe rode, se ledikasyon. Reform dan ledikasyon i enn ki esansyel, akoz se selman atraver ledikasyon ki nou lavenir koman en endividi, sosyete e Nasyon i garanti. Lenvestisman dan ledikasyon nou Nasyon i reprezant en lenvestisman pour lavenir nou pei.

Pour lannen 2023, sekter ledikasyon in ganny en sonm R 1.34 bilyon ki reprezant 4poursan prodwi domestik brit.

Minister Ledikasyon pe ganny en ogmantasyon R218.5milyon, ki reprezant transfer fon letid sorti kot ansyen Lazans Devlopman Resours Imen.

Parey mon ti anonse dan Bidze 2022, Gouvernman in konplet negosyasyon avek sekter prive pou ofer servis 'WIFI' dan lekol.

E sa pou kout R6.8milyon dan Bidze 2023.

Mr Speaker, Gouvernman pou kontinyen donn provizyon gadyak pour tou etidyan dan lekol leta, primer e segonder,

(APPLAUSE)

MINISTER NAADIR HASSAN

... pour asire ki tou zanfan i konmans zot lazournen letid avek en repa, pou permet zot konsantre e donn zot 'maximum' dan zot letid.

An 2023, sa pou kout R17.9milyon. Striktir ki nou'n met an plas pou fer sir ki bann zanfan i ganny en dezennen neserer depi trwazyenm trimes an 2022, pou kout R20.1 milyon dan Bidze 2023.

Gouvernman i ankor pe donn lenportans ankouraz nou popilasyon pou kontiny zot letid avanse. Ler sa ladministrasyon ti vin o pouvwar, ti ankor annan bokou etidyan ki ti pe espere pou kontiny zot letid avanse. Mon la kapab anonse ki tou etidyan ki'n kalifye in kapab fer li.

An 2023, en sonm R205.1milyon in prozekte, pou asire ki bann etidyan i kontinyen avek zot letid avanse. Mr Speaker, malgre sa difikilte ekonomik ki nou ti ladan, sa Gouvernman pe kontinyen

investir dan nou bann zenn, pou garanti zot en bon lavenir.

Mr Speaker, pou asire ki bann etidyan Seselwa i dan konfor ler zot al etidye aletranze, pour 2023, Gouvernman in fer en ogmantasyon 10poursan dan 'stipend' pour bann etidyan ki pe etidye dan 17 pei, ...

(APPLAUSE)

MINISTER NAADIR HASSAN

... an vi ogmantasyon dan kou pri lavi. Sa ogmantasyon i baze lo en evalyasyon lo kou lavi dan sa bann pei ki nou'n fer.

Bann etidyan ki pe fer zot letid kot Liniversite Sesel, pou osi benefisye avek sa ogmantasyon 10poursan dan zot 'stipend'.

(APPLAUSE)

MINISTER NAADIR HASSAN

En sonm R2.5milyon in ganny bidzete pour sa ogmantasyon. Pou konplemant program Gouvernman lo letid avanse, Gouvernman in osi finaliz diskisyon avek labank komersyal, lo en lankadremman pour en skim 'loan' edikasyonnel.

Sa skim ava en lot opsyon pour bann endividi ki anvi devlop en lot skil baze lo

demann pei. Bann paramet pour konm swivan;

1. 'loan' maximum pour R800,000

2. Gouvernman pou donn en sibvansyon 4poursan lo sa bann 'loan'

3. Term repeyman pour en maximum 10 an

4. Gouvernman pou donn en garanti lo sa bann 'loan'

5. Pou napa kontribisyon personnel lo sa bann 'loan'

6. En moratwar pandan letan ki sa endividi pe etidye pour peyman kapital. Me Gouvernman pou repey sibvansyon lentere e bout lentere ki endividi i bezwen repeye pou ganny 'capitalise'.

An vi ki nou pe donn en term repeyman 10an, sa i ava donn letan pou bann etidyan fini pey zot 'loan' e apre sa zot kapab dan en pozisyon pou zot pran en 'loan' pou fer zot lakaz.

(APPLAUSE)

MINISTER NAADIR HASSAN

Alors Mr Speaker, mon demann bann endividi pou pran sa bann loportinite finansman. Sa i pou en lot opsyon apar ki fon letid ki egziste avek Minister Ledikasyon. En provizyon R8milyon in ganny bidzete pour

sa skim ‘loan’ edikasyonnel pour lannen 2023.

Pou asire ki pei pe depans larzan dan fason pli efektiv e osi, vize ver en stratezi lonterm, nou ekspekte finaliz plan resours imen dan premye lanmwatye lannen 2023.

Lo kote bann proze dan sekter ledikasyon, en sonm R89.9milyon pe ganny bidzete an 2023 anba Bidze Minister Ledikasyon, ki pou osi enkli finansman pour serten proze dan sekter ledikasyon ki’n ganny bokou retar pour enplimante, menm si sa bann proze ti dan Bidze pandan sa bann dernyen lannen. Sa i enkli:

□ Konstriksyon en nouvo blok laklas e osi renovasyon lo en blok laklas ki deza an egzistans pour lekol primer Larozyer. Sa i en sonm - R19.3 milyon

□ Konstriksyon nouvo lekol Ladig primer e segonder – R31.2milyon

□ Renovasyon lenfrastruktir pour lekol Ortikiltir e Lagrikiltir (SIAH) – R 8.3 milyon e

□ Konstriksyon sant ‘Day Care’ Le Manmel- R4milyon

(APPLAUSE)

MINISTER NAADIR HASSAN

Mr Speaker, ler nou pe koz lo reform dan ledikasyon, nou osi bezwen mazin reform dan ‘curriculum’. Avek lanbisyon Gouvernman pou devlop lekonomi nimerik, nou pe depan bokou lo nou sistenm ledikasyon pou adopte e adapte pou ansenny Lenformasyon, Kominikasyon ek Teknolozi (ICT) dan lekol.

Gouvernman in konmans en diskisyon avek bann partener, pou met an plas en lankadrem formasyon pour bann profesyonnel ‘ICT’ dan sekter ledikasyon.

Dan sa menm laliny nou pou kontinyen avek ‘laptop’ skim pour bann etidyan, ki pou kout nou R5milyon an 2023.

En sonm R27.6milyon in bidzete an 2023, pour ‘Day care Scheme’ e dan ‘ECCE Trust Fund’ i annan en sonm R1.6milyon ki’n ganny bidzete. Bann ‘day care’ e ‘childminders’ i ganny asiste anba sa fon, kot zot kapab fer laplikasyon pour lekipman ki a met zot lo bann standar ki Lenstiti Development Pti Anfans (IECD) in etabli.

Mr Speaker, Gouvernman pe investir bokou dan sistenm ledikasyon pour epanouisman nou bann zenn. Nou pe enplor zot pou pran sa loportinite pour

zot etidye, pour ki zot vin bann adilt responsab e serye.

Zis pou donn zot sonm ki Gouvernman pe investir dan sak zanfan ki dan lekol Leta e ki dan bann lenstitisyon pos-segonder, nou kalkilasyon i konm swivan :

Pour bann ki dan lekol formel, an 2022, pe kout nou R42,242.71 par etidyan dan lekol primer pour en an, e an 2023, sa sif pou monte pou ariv R42,914.08. Pour en etidyan segonder, an 2022 pe kout nou R57,290.16 par an, e par kont an 2023 sa sif pou monte pou ariv R 61,264.91.

An 2022, pe kout nou R 57,240.37 par an, pour en etidyan ki dan en lenstitisyon post segonder, e an 2023, pou kout nou R 57,878.44.

Mr Speaker, sa bann sif i signifikan, alor mon lapel avek tou etidyan, se pou pran zot letid o serye, akoz sa ledikasyon ki zot pe gannyen i pa pou nanryen, se *'taxpayers'* pe kontribye bokou pour zot ganny sa ledikasyon pou asir zot lavenir.

Sekter Lakaz

Mr Speaker, sekter lozman i reste enn bann pli gro defi pour okenn Gouvernman. Sa lalis kot endividi pe rod en lakaz

avek Gouvernman i kontinyen agrandi. Avek problem ekonomik ki nou'n pas ladan pandan sa dernyen 2an, ti napa bokou opsyon pou finans konstriksiyon lakaz abordab lo en gran lesel.

Me toudmenm, nou'n reisir konplet diferan proze lakaz kot plizyer fanmir in benefisyè. An ou, an 2022 in annan 82 *unit* ki'n konplete e sa i enkli:

- 24 younit *'PSSW'* Kaskad pou en valer R40.6 milyon

- 18 younit *'Ex Onezime'* Ansopen pou en valer R 24.6 milyon

- 16 younit dan zil Belonm pou en valer R 21.9 milyon

- 24 younit *'Ex Sacos'* Remiz Ans Rwayal pou en valer R25.7milyon. Avek bi pou diversifye nou prodwi lakaz, Gouvernman pe eksplor diferan fason inovativ pou ankouraz bann ki kapab pou finans zot konstriksiyon pou servi sa mwayen, me pour zot fer sa, i enportan ki zot ganny akse avek finansman ki abordab.

Finansman Abordab dan sekter Lakaz

Alor, Mr Speaker, skim pour sibvansyon lakaz ti ganny

etablir pou amelyor akse konstriksyon abordab pour en endividi vin propriyeter son prop lakaz. Sa aplikan i bezwen osi pe vin propriyeter son lakaz pour premye fwa. Sa sibvansyon i azout lo 'loan' lakaz sa aplikan, e i pa bezwen repey sa. Dan sa de dernyen lannen, in annan bokou sanzman dan pri konstriksyon ek lezot faktor ki anpes lamazorite Seselwa benefisyé avek sa skim. Donk, i annan en nesesite pou revwar sa. Konmansman Zanvye 2023, sa bann 'to' pou ganny revize konm swivan,:

□ Mae: Apartir R8,500 par met kare ziska R9, 500 par met kare

□ Pralen: Apartir R9, 500 par met kare ziska R11, 500 par met kare

□ Ladig: Apartir R12, 500 par met kare ziska R13, 500 par met kare.

Gouvernman pou osi redwir kontribisyon personnel ki pour bezwen anba sa skim pou ariv 5poursan olye 7.5poursan.

Mr Speaker, Gouvernman pe osi entrodwir en nouvo limit ki aplikan i kapab benefisyé anba sa skim. Nou'n war ozordi ki i annan aplikan pe fer bann lakaz en pe pli gran ki pe fer zot pa kapab konplet zot konstriksyon, menm avek sa

sibvansyon. Alors Gouvernman pe entrodwir en '*limit maximum*' 125 met kare pour en aplikan kalifye anba sa skim.

En sonm R18milyon in ganny prozekte dan bidze 2023 pou skim pour sibvansyon lakaz.

Touzour an sa ki konsern lakaz abordab, Gouvernman i osi konsernen avek sa kou lasirans ki relye avek en 'loan' lakaz, sa i apepre 6 poursan 'loan' total.

Savedir en kliyan ki pran en 'loan' R1.5 milyon i pey apepre R90,000. Gouvernman pe eksplor tou opsyon pour redwir sa kou. An premye lye nou pe al konmans diskisyon avek bann lakonpanyen lasirans e osi son regilater, pou vwar ki opsyon nou kapab annan pou fer sa pri pli abordab. En lot opsyon ki pe ganny konsidere se pou etablir en fon ki a kouver bann '*claims*', dan evantyalite en lanmor ouswa dezabilite permanan.

Revwar '*Stamp Duty Order*'

En lot mezir ki Gouvernman pe pran Mr Speaker, pour fasilite prosedir pour en endividi annan son prop propriyete i nou pe revwar '*stamp duty order*' pour endividi ki pe aste en lakaz oubyen en bout later pour premye fwa. Ozordi sa

endividi i ganny sa egzansyon pou pa pey 5 pousan ‘stamp duty’ lo sa premye R2milyon. Si sa lakaz ouswa bout later i plis ki R2milyon, i pey ‘stamp duty’ lo sa diferans selman.

Mr Speaker, nou’n war bokou ka ki endividi in aste later plis ki R5milyon, e aköz i premye fwa in aste later in osi benefisye anba sa egzansyon lo sa premye R2milyon. Nou’n konstate ki sa Polisi pe osi aplikab pour dimoun ki kapab pey ‘stamp duty’. Alors Gouvernman in revwar sa Polisi, e sa egzansyon pou aplikab pour selman endividi ki aste en propriyete, ouswa en bout later pour premye fwa e pa kout pli ki SR3 milyon.

Sa I en ogmantasyon sorti R2milyon pou vin R3milyon. Okenn endividi ki aste en propriyete ouswa en bout later par lao R3milyon, pa pou benefisye avek sa egzansyon.

Proze Lakaz Gouvernman

Mr Speaker, apard sa bann mezir pou fasilite akse avek finansman abordab pour bann endividi ki kapab finans zot prop lakaz, Gouvernman lo son kote pe kontinyen avek son program lakaz.

An se moman, i annan 127 ‘unit’ ki dan faz lenplimantasyon, e sa i konpri:

- 16 younit ‘Corgate Estate’
- 16 younit Zil Perseverans
- 8 younit Ros Kayman
- 6 younit Corsair - Belonm
- 6 younit Sen Lwi
- 4 younit Beler (*Ex SPDF*)
- 25 younit Forenwanr-Porglo
- 22 younit Kan Gard - Plezans
- 24 younit ‘Union Vale’

Mr Speaker, pou sa mwayen term ki devan nou, en sonm total R1.18bilyon in ganny prozekte pou al anver devlopman pou nouvo lakaz e R137 milyon anver bann diferan proze *land bank*. Pour lannen 2023, R389.4milyon ki reprezant 27.6pousan Bidze total lenvestisman pe ganny bidzete zis dan sekter lakaz e later.

Sa Bidze kapital pe finans diferan proze lakaz ek proze ‘land bank’, enkli :

- nouvo proze pou konstriksiyon 342 ‘unit’ lakaz abordab.
- proze lenfrastruktir pou fasilite konstriksiyon 128 lakaz ‘mid-range condos’ ki ava ganny

fer atraver finansman sorti kot bann aplikan

□ kontinyasyon bann diferan proze lakaz ki pa pou ankor fini pandan lannen 2022 e

□ bann diferan proze ‘*land bank*’ a en kou R42.35 milyon.

Ansanm avek bann nouvo mezir, i bon note ki ‘*part rental*’ skim pour lakaz e ‘*Home Improvement/Re-roofing*’ pour pansyoner i reste an plas e en sonm R11.8milyon e R5milyon respektivman pe ganny bidzete pour 2023.

Mr Speaker, parey zot kapab konstata, Gouvernman pe met a dispozisyon nou popilasyon diferan prodwi lakaz, kot sa ki kapab i ava akse finansman lo bann term pli favorab, e bann ki pa kapab Gouvernman ava ede pou konstrir pour zot.

Sports

Mr Speaker, si i annan en keksoz ki anmenn nou pei ek popilasyon ansanm se *sports*. *Sports* i enkli partisipasyon nou tou aköz nou tou nou annan en disiplin sportif ki nou kontan. *Sports* i annan sa pouwar pou anmenn fanmir, ek kominote ansanm.

Ki pli gou ki sa, ler nou war nou popilasyon in rasanble

ansanm dan bann fasilite sportif pe siport nou lekip, pe angaz nou dan legzersis pou gard nou an bonn sante e pe anmenn nou sipor pour nou manm fanmir ek lekip prefere ki pe partisipe?

I zisteman aköz sa bann bon benefis pozitiv ki *sports* i anmenn, pour nou tou e nou pei, ki plis zefor pe ganny mete pou repar bann fasilite sportif dan pei.

Mr Speaker, pli boner sa lannen, mon ti al fer en vizit ansanm avek Minis pour *Sport*, kot plizyer fasilite sportif. Mon bezwen dir ki i vremen regretab e fer lapenn pou vwar zot leta. Laplipar in avarye, aköz pandan plizyer lannen zot in ganny neglize. I kler ki pandan sa bann lannen in napa en plan ‘*maintenance*’ pour sa bann fasilite.

Pandan lannen 2022, nou deza annan serten proze reparasyon ki an faz lenplimantasyon. Travay lo sanz twatir ‘*Palais des Sport*’ pou konplete byento me Gouvernman in osi enkli bann lezot travay parey revwar sistenm lalimyer e son, e osi bann ‘*shutters*’ pour evite ki *sports* i ganny afekte pandan letan lapli. Sa renovasyon pe kout en total R3.3 milyon.

Bann lezot proze i remet nouvo twatir lo lenfrastruktir sportif Ladig a en sonm R1.4milyon e osi renovasyon 'fitness trail' Ros Kayman a en sonm R450,000mil.

Renovasyon lo striktir Stad Linite pe osi ganny fer ki enkli adres bann problem delo koule kot seksyon medikal. Travay pou kontinyen an 2023 avek Federasyon Foutbol pou met en nouvo sirfas 'Astro turf', 'track' atletik, e nouvo lalimyer. Sa bann proze lo Stad Linite i ekspekte kout R 6.9milyon ler i konplete.

Gouvernman pe osi al konmans travay pou resirfas kort tennis Ros Kayman. Gouvernman pe osi travay pou repar bann lezot lenfrastruktir sportif an 2023. En total R11 milyon pe ganny prozekte dan Bidze 2023 pour sa bann proze swivan;

1. Renovasyon *Sports 'Complex'* Ans Rwayal - R3.75milyon
2. Konstriksyon *Indoor Court* Ans Rwayal - R4milyon
3. Renovasyon *Sports 'Complex'* Ladig - R1.75milyon e
4. Amelyor bann fasilite lenfrastruktir sportif - R1.5milyon

Mr Speaker an 2023, nou bann atlet pou partisip dan de gran konpetisyon

enternasyonal: Zwe De Zil Losean Endyen ek Zwe Lafrik, alor Gouvernman in fer en alokasyon R37milyon pou asir partisipasyon nou bann atlet dan sa de zwe.

Nou pe osi met en prozeksyon R15 milyon dan Bidze 2024 pour devlopman sport lo en baz profesyonnel.

Mr Speaker, Gouvernman pou bezwen investir bokou larzan pou remet mazorite lenfrastruktir sportif lo en nivo akseptab. Me, nou determinen pou fer li, akoz nou rekonnèt benefis pozitiv ki sports i anmennen dan pei.

Sekter Sosyal

Mr Speaker, parey in leka pandan sa dernyen 2 an, Gouvernman in kontinyen investir dan bann benefis ek program anba Lazans Proteksyon Sosyal (ASP). Sa i reste en priyorite Gouvernman. Nou rekonnèt ki dan lavi, nou tou nou kapab pas dan serten difikilte, e ki nou tonbe.

Langazman Gouvernman dan sa sekter, se pou donn lasistans kot i neser e merite, e ed ou pou sirmont ou bann defi e redebout lo ou lipye, kot ou pe travay pou sonny ou fanmir, e kontribye ver sosyete e ou pei.

Gouvernman in fer son pozisyon kler ki depandans lo benefis sosyal i bezwen ganny redwir, e sel fason pou fer sa, se pou met tou Seselwa ki kapab, dan en lanplwa.

An vi ogmantasyon dan kou komodite aköz sa lager ant Ikrenn ek Larisi, Gouvernman ti konmans pran bann mezir pou siport bann ki saler i pli ba, byen boner.

An Me sa lannen, nou ti reviz par 32 poursesan '*weights*' benefis sosyal e an Zilyet, plizyer lezot mezir tanporer ti vin an fors:

□ Travayer, ki swa dan sekter piblik oubyen sekter prive, ki ganny en saler pli ba ki R 8,500 pe ganny en lasistans finansyel tanporer R 500.

□ Travayer, ki swa dan sekter piblik oubyen sekter prive, ki ganny en saler ant R 8,500 a R 9,000 par mwan ti ganny en lasistans tanporer ki pou asire ki zot ganny R 9,000 par mwan.

□ Dimoun ki zot reveni i mwens ki R 9,000 avek en bil elektrisite ki lo zot non, pe ganny en sipor adisyonnell R300, lo zot bil.

□ Dimoun ki pe ganny en lasistans avek Lazans Proteksyon Sosyal, pe resevwar en lasistans finansyel tanporer, tou le mwan. Sa i pour bann

pansyoner, '*Home Carer*', e pour bann ki resevwar benefis envalidite, ek dezabilite ...

□ An Oktob, Gouvernman ti entrodwir '*maximum retail price*' (MRP) lo 14 komodite debaz ki '*Seychelles Trading Company*' (STC) i enporte pou asire ki pri sa 14 komodite i parey lo Mae, Pralen ek La Dig

□ An Oktob, osi nou ti donn en egzansyon 25 poursesan *Excise Tax* lo karbiran, pour bann bato ki transport marsandiz ant Mae, Pralen ek Ladig

Mr Speaker, Gouvernman ti anonse ki sa lasistans tanporer ti pou ale ziska le 31 Desanm, mon oule anonse ki sa lasistans pou aprezan kontinyen ziska lafen Mars 2023. Apartir Avril, sa lasistans pou arete, aköz ogmantasyon dan saler ki pou'n pran lefe.

(APPLAUSE)

MINISTER NAADIR HASSAN

Par kont, bann benefisyer program anba Lazans Proteksyon Sosyal ki'n kalifye anba sa program, depi Zilyet, 2022 – savedir bann ki ganny benefis retret, benefis envalidite ek benefis dezabilite, e '*Home Carer*', sa lasistans pou kontinyen.

(APPLAUSE)**MINISTER NAADIR HASSAN**

Mr Speaker, en alokasyon R1.2bilyon pe ganny bidzete pour bann benefis ek program anba Lazans Proteksyon Sosyal. Sa sonm i en rediksyon R241milyon konpare avek Bidze 2022. Sa rediksyon i akoz peyman pour bann ‘*Home Carers*’ pou sorti anba sa Lazans, an 2023, an vi kreasyon sa nouvo Lazans ‘*Home Care*’. Prozedlwa pour kreasyon sa lazans i sipoze vin devan Lasanble tre byento.

Mr Speaker, bann pli gro sonm anba bann benefis e program Lazans Proteksyon Sosyal i konm swivan;

□ R840.3milyon pou benefis retret konpare avek R820.6milyon an 2022

□ R116.0milyon pou benefis envalidite konpare avek R109.4milyon an 2022

□ R150.6milyon pou benefis dezabilite konpare avek R 141.8milyon an 2022 e

□ R61.8milyon pour ‘*Social Safety Net*’ konpare avek R40.7 milyon an 2022

Mr Speaker nou osi pe travay pour met an plas en lankadremman pou evalye bezwen bann endividi ki pli

vilnerab dan en lapros sosyoekonomik, ki pa zis regard saler en lakour dan bann kriter pou evalye si en endividi i kalifye pour lasistans benefis sosyal.

Avek bi pou asir lefikasite sistenm proteksyon sosyal, en sonm R2.5milyon in ganny bidzete, pou met an plas en nouvo sistenm nimerik pour Lazans Proteksyon Sosyal.

Sa sistenm pou fer ki ASP, i a pli byen plase pou adres son bann defi e bouz devan avek son program modernizasyon. Bann lobzektif kle sa sistenm, se pour redwir bann risk frod, e asire ki bann benefis i ganny peye a bann endividi e lakour ki kalifye.

Gouvernman atraver sa program ‘*PforR*’ ki i pe enplimante avek sipor Labank mondyal, pou o kour 2023 fer bann travay nesaser, pour ki i kapab evantyelman an 2024 entrodwir en rezis sosyal.

Mr Speaker en *social register* i annan de rol; premyerman en rol Polisi sosyal koman en sistenm enkliziv e dezyenmman en rol operasyonnel koman en sistenm nimerik. I esansyelman en sistenm nimerik ki siport sansibilizasyon, admisyon, lanrezistremman e determinasyon, admisibilite

pour bann diferan program e benefis sosyal.

An plis ki siport lanrezistrem e admisyon, bann 'data' ki ganny prodwir par en rezis sosyal i osi ganny servi pou ede kalkil nivo benefis, ede dan planifikasyon e sirveyans e evalyasyon.

En tel sistenm, pou osi anmenn plis kordinasyon ant bann diferan Lazans, redwir bann prosedir anrezistrem, e fer ki bann dimoun ki dan bezwen i a kapab akse bann diferan servis pli vit.

Mr Speaker, Bidze pour bann pti proze kominoter ki fer en gran diferans dan kominote e fasilite lavi nou bann dimoun pour 2023, i pour en sonm R20milyon. Anplis ki sa bann pti proze, Gouvernman pe osi antreprann serten proze lo nivo kominoter ki pou ed sa bann kominote spesifik. Sa i enkli:

Konstriksyon Sant Kominoter Kaskad

Konstriksyon Ladministrasyon Distrik Zil Perseverans

Konstriksyon semen Bodamier Ansopen

Konstriksyon semen Adela – Pwent Lari

Renovasyon Sant Kominoter Baie Ste Anne

Konstriksyon Ladministrasyon Distrik Belonm

Renovasyon Sant Kominoter e Ladministrasyon Distrik Ladig

Nouvo twatir pour Sant Kominoter Ans Rwayal

Renovasyon bann lenfrastruktir '*day care centres*'

Renovasyon Sant Kominoter e Ladministrasyon Distrik Gran- t-Ans Pralen

Renovasyon Sant Kominoter Sen Lwi

Renovasyon Ladministrasyon Distrik Kaskad

Renovasyon Ladministrasyon Distrik Porglo

Mr Speaker, pour nou pei bouz devan, nou bezwen bann sitwayen for, responsab e serye ki kapab e pare pou travay dir pou benefis zot fanmir ek pei. Nou konnen, ki en kous nou popilasyon pe fer fas avek bokou fleo sosyal, espesyalman adiksyon drog. Nou Gouvernman i rekonnèt ki tou dimoun ki tonbe i devret ganny en dezyenm sans pou refer zot lavi e i pour sa rezon ki nou pe envestir dan bann fasilite reabilitasyon. Pour lannen 2022, Gouvernman pe bidzete en sonm:

□ R 6.9milyon pour konmansman proze fasilite ‘MAT’ clinic (*Medically Assisted Treatment*).

□ R9milyon pour konmansman proze ‘*Youth Hope Residential Center*’ kot bann zenn anba laz avek problemn latitud e ki’n ganny refer par Lakour pou ganny reabilite. Sa, i ava osi asire ki zot pa dan menm fasilite ki bann adilt.

Mr Speaker, lenvestisman pou donn nou zenn ki’n tonbe en dezyenm sans pou refer zot lavi, i enportan e nesese aköz son konsekans pou enn katastrofik pour nou lavenir. Ler nou annan zenn ki depandan lo drog, ki pa travay, ki pa kontribye e ki pe angaz li dan bann aktivite ilegal, se nou tou, koman en sosyete ki santi son lenpak.

Alor i sanmenm sa ki nou Gouvernman pe investir dan sa bann proze ki pou siport e fourni lasistans direk pour nou popilasyon.

Mr Speaker, an vi nou popilasyon ki pe vyeyir, i reste touzour en priyorite nou Gouvernman pou fer sir ki zot resevwar swen e viv dan konfor. I pour sa rezon ki an 2023, tou ‘*Home Carers*’ pou ganny anploye par en Lazans, savedir

zot pou nepli tonm anba Lazans Proteksyon Sosyal.

(APPLAUSE)

MINISTER NAADIR HASSAN

Prozedlwa pou kree Lazans ‘*Home Care*’ pou vin devan Lasanble byento. Pour lannen 2023, nou pe prozekte en Bidze R321.74milyon pour sa Lazans. Lentansyon kree sa lazans se ki Gouvernman i oule ki sa servis i vin enn ki pli profesyonnel, an vi bann swen spesifik ki nou bann dimoun aze i bezwen.

Sa nouvo striktir pou bann ‘*Home Carers*’ pou asire ki sa bann travayer pou fonksyonn dan en lankadrem legal kot i annan plis sertitud, e sa ava osi ed zot annan akse avek ‘*loan*’. Prenan an kont lenportans ki Gouvernman pe mete lo byennet sosyal, Bidze Departman Zafer Sosyal pour 2023 pe ogmante, pour permet sa Departman *recruit* 9 nouvo travayer sosyal.

Sa logmantasyon a permet Departman Zafer Sosyal pou kontiny zot travay remarkab dan proteksyon nou bann zanfan, bann fanmir e adilt pli vilnerab dan nou sosyete.

Lord ek Lape

Mr Speaker, lord ek lape i en sektor priyorite ki nou Gouvernman pe met bokou lanfaz lo la. Pour 2023, Minister Zafer Entern pe ganny en Bidze R 95.9 milyon pour lenplimantasyon diferan proze anba son portfolio. Sa i enkli;

□ R8milyon - pour renovasyon Kordgard Santral

□ R21.7milyon - pour konstriksiyon nouvo Kordgard Praslin

□ R5milyon - pour konstriksiyon nouvo Kordgard Zil Perseverans

□ R7.9milyon – pour proze konstriksiyon nouvo sant rimann

□ R2.4milyon – pour renovasyon ‘*Youth Offenders Facility*’.

□ R9.5milyon – Resours e depans operasyonnel e osi resours imen adisyonnèl pour Departman Prizon.

Mr Speaker, sa lager kont drog ki nou Gouvernman pe antreprann, i enn ki difisil e i vin avek bokou kompleksite. Me nou Gouvernman i determinen ki sa fleo i bezwen ganny detrir.

(APPLAUSE)

MINISTER NAADIR HASSAN

Parey Prezidan Ramkalawan in toultan pronons li lo la, son

Gouvernman pe e pou kontinyen anmenn en lager asarnen kont trafik drog dan pei, aköz son konsekans i enn ki devastater lo nou pti popilasyon.

Sa lager i bezwen lo diferan fron, kot nou pa pe zis target lenportasyon drog ek lezot aktivite ilegal lo later, me osi lo lanmer. Alor i avek sa bi ki Gouvernman pe etabli en stasyon gard lakot lo Praslin. Pour 2023, en alokasyon R 3.1 milyon in ganny bidzete pour sa proze.

Mr Speaker, pou gard lord ek lape ek sekirite i enn ki koute. Gouvernman pe toultan etidye nouvo fason fer keksoz, kot efikasite i primordyal, me sa ki enportan se ki nou Gouvernman pou toultan garanti lord, ek lape dan pei, afen ki nou popilasyon i viv en sekirite.

Lekonomi

Mr Speaker, nou reste angaze avek nou azanda transformasyon ekonomik dan sa senk sektor ki mon’n liste lo konmansman mon diskour, ki anliny avek nou plan devlopman stratezik. I pour sa rezon ki lenvestisman dan lenfrastruktir ki pou permet

lagrandisman ekonomik pou kontinyen ganny fer.

Sekter tourizm

Mr Speaker, avek lasistans Lorganizasyon Mondyal pour tourizm (WTO), Sesel in devlop son premye ‘*tourism satellite account*’ ki pou mezir lenpak sekter tourizm lo lekonomi e pou evalye kontribisyon sa sekter lo prodwi domestik brit.

En letid pou ganny fer an 2023, pour nou pli byen konpran sekter tourizm e son benefis ki i kontribye dan lekonomi.

Mr Speaker, Gouvernman pou osi travay pou konsolid ‘*supply chain*’ dan lendistri lokal e son lyen avek sekter tourizm, espesyalman pou ranplas prodwir enportasyon avek prodiksyon lokal ki zot a kapab furni sa sekter.

Bann biznes i bezwen antre dan bann aktivite ki pour fer viziter depans plis, parey dan bann aktivite dan la natir ouswa bann restoran ki spesyalize dan manze kreol.

Sekter Lagrikiltir

Mr Speaker, bokou lanfaz i osi pe ganny mete pou amelyor servis ekstansyon pour nou bann zofisye kapab asiste plis

nou bann fermeye, pou amenn sa transformasyon dan sekter agrikol, kot nou bann fermeye a kapab ganny akse avek plis lenformasyon, teknolozi e rezilta bann resers avek bi pou kontinyen ogmant prodiksyon lokal.

In annan serten restriktirasyon ki’n ganny fer avek, bi pou amelyor servis ki sa seksyon i ofer nou bann fermeye, e sa i osi enkli plis formasyon ek devlopman kapasite dan teknolozi anmas e partaz lenformasyon.

Departman Lagrikiltir pe osi kontinyelman antreprann serten reform avek stor lagrikiltir, pou fer li mars pli konsistan avek bezwen nou bann fermeye. Stor Lagrikiltir pe osi ganny modernize pou delivre en servis ki pli efikas e bokou demars in deza ganny fer pou etabli kontak avek bann nouvo furniser, pour nou kapab amelyor lo kalite, la kantite e konsistan, pou asire ki touzour i annan bann prodwir debaz lo stor.

Departman Lagrikiltir pe osi revwar plan prodiksyon bann fermeye e analiz bann difikilte ki fermeye pe fer fas avek, kot nou pe osi ankouraz prodiksyon soutenab an servan teknolozi modern, par egzanp

plant anba kouvertir ‘*High tech Crop Production*’.

En stratezi kle ki Departman Lagrikiltir in mentenir pour sa dernyen 2an, se sipor sibvansyon ki pe ganny revize, pou fer ki sa skim i vin pli targete, efikas e soutenab. En sonm R30 milyon in ganny bidzete anba sa skim pour lannen 2023 konpare avek R98.9milyon an 2022.

En alokasyon R40.5milyon in ganny bidzete anba proze kapital pour lannen 2023 anba Departman Lagrikiltir, pou finans bann proze dan diferan distrik ki ava annan en lefe direk lo bann ferme. En total R10.2 milyon in osi ganny bidzete pou kontinyasyon proze pou konstriksyon en nouvo labatwar.

Parmi bann proze idantifye pour 2023 i:

- Konstriksyon bazar Ans Bwalo ek La Retret

- Amelyor sistenm irigasyon

- Netway larivyer ek lanmar ki bord avek later lagrikiltir

- Renovasyon bazar Viktorya

- Renovasyon batiman servis ekstansyon

- Amelyor ‘Bulk Store’ lo Pralen ek Mae e osi *requisite store* lo Ladig – R4milyon

Gouvernman in osi fer en provizyon R3milyon anba fon devlopman lagrikiltir. Sa provizyon pou ogmante pou ariv R10milyon e R15milyon an 2024 e 2025 respektivman.

Sekter Lapes e Lekonomi Ble

Parey in anonse dan bann bidze oparavan, lentansyon Gouvernman se pou ankouraz plis valer azoute dan nou sekter lapas ek lekonomi ble. Pou siport sa stratezi, Gouvernman in fer en alokasyon R25.3milyon an 2023 e R50milyon an 2024 pou devlopman lenfrastruktir ‘Ile Du Port’, kot bann ‘*Fish Processing Plants*’ pou sitye. Nou bezwen investir dan bann lenfrastruktir dan sa sekter, pou war plis krwasans an mwayen term.

Dernyen transfer ‘*Blue Bond*’ ekivalan R 30.1 milyon pou ganny fer dan ‘*Blue Investment Fund*’ avek Labank Devlopman Sesel. Premye proze pour en total US \$3milyon in ganny aprouve anba sa fon an 2022. Balans alors anba sa fon i pou US \$9milyon konmansman 2023.

Nou pou alors ankouraz bann investiser pou rod finansman anba sa fon an vi bann kondisyon preferansyel konm swivan;

1. To lentere 4poursan
2. Term repeyman 1an
3. Kontribisyon personnel selman 10 poursan

Mr Speaker, Lotorite Lapes i ekspekte konmans konstriksiyon en batiman pour son 240 travayer.

Pandan lannen 2023, Lotorite Lapes pou osi konmans bann proze ki pou benefisye sa sekter;

1. ‘Gear store’ Glacis
2. Resirfas e amelyor fasilite irigasyon
3. Bazar e ‘Gear Store’ Anse La Mouche
4. Platform kontener Belonm
5. En ‘holding chiller’ kot Erport
6. En platform kontener e en mini ‘warehouse’ Providans pour en sonm R1.7milyon e R 6milyon respektivman.

Pou permet lagrandisman e diversifikasyon dan sa sekter, i annan en nouvo mezir taks ki mon pou anonse pli tar ki pou benefisye bann akter dan ‘fish processing’ ek akwakiltir.

Sekter “Digital Economy”
(Lekonomi Nimerik)

Mr Speaker, dan sa transformasyon ekonomik, devlopman lekonomi nimerik, i reste enn ki kle, aköz avek teknolozi, keksoz i vin pli fasil, pli senp, pli efikas, pli aksesib, pli transparan e pli enportan i permet ou redeplway ou resours kot i vremen nesese e merite. Adopsyon teknolozi dan nou bann tranzaksyon toulezour, i permet nou popilasyon akse servis ek loportinite.

I pour sa rezon ki Gouvernman pe kontinyen envestir dan bann proze pou siport amelyorasyon lenfrastruktir teknolozi dan pei. Gouvernman in fer en alokasyon R424.6milyon dan mwayen term e sa i reprezant 1.4 poursan GDP. Sa sonm i enkli R145.1milyon an 2023. Lenplimantasyon sistenm idantite elektronik in vin operasyonnel ver lafen Oktob 2022. Sa sistenm pou kle dan devlopman azanda lekonomi nimerik.

Pour 2023, lanfaz pou ganny mete lo enterfas bann sistenm Gouvernman ek sekter prive pour servi platform ‘Sey-ID’. Bann servis ki deza aksesib ‘online’ i lanrezistremman bann biznes e lasosyasyon.

Dan sa menm loptik, mon Minister in fek lans son

platform nimerik, pou ki lavant alankan bann byen Gouvernman ki'n ganny laprouvasyon pou vann i ganny fer lo sa platform. Preme lavant alankan ti fer tar en Oktob, e adopsyon teknolozi in fasilite sa legzersis, e fer sa servis vin pli aksesib avek manm piblik.

Lannen prosenn, nou pe al adopte en rezis tou endividi oubyen biznes ki oule partisip dan bann 'tender' ki Gouvernman i fer. Annan en tel rezis ava ede pou redwir bann prosedir ki bann 'bidders' i bezwen pas atraver pou partisip dan bann 'tender' Gouvernman.

Nou pe osi ekspekte sistenm lenformatik lasante vin an mars ver la fen 2022. Gouvernman pou lans 'tender' pour sa nouvo sistenm lenformasyon entegre pour zesyon Finans Piblik (*Integrated Financial Management Information System*) an 2023. Sa proze i ekspekte konplete an 2025.

Proze paspor biometrik pou konplete avan lafen 2022. Sa nouvo sistenm paspor, i ava ede pour Sesel amelyor bann eleman sekirite dapre standar Lorganizasyon Enternasyonal Lavyasyon Sivil (*ICAO*). Sa i enkli R29milyon ki'n al anver sa nouvo sistenm li menm, e

R8.4milyon ki'n al anver sistenm sinyatir nimerik pou paspor biometrik ki konpatib avek standar ki *ICAO* i demande. Detay enplimantasyon pou ganny kominike avek piblik par Minister Zafer Entern.

Mr Speaker, dan nou demars pou devlop nou sekter lekonomi nimerik, i nesese ki nou osi met an plas bann lankadremans legal pou asir proteksyon ek son loperasyon. Alors, en nouvo Prozedlwa 'Data Protection Bill' pou ganny propoze devan Lasanble Nasyonal pandan premye sis mwan lannen 2023. Sa nouvo Prozedlwa pou protez lenformasyon personel en endividi.

Nou pou bezwen fer bokou program edikasyonnel, pour edik manm piblik lo bann provizyon sa Lalwa. Sa Lalwa pou ede donn pli konfyans bann envestiser, ki zot lenformasyon personel pou ganny proteze parey i egziste dan bann lezot pei.

Osi, en nouvo Lotorite Regilater Kominikasyon pou ganny kree anba Prozedlwa Kominikasyon ki deza devan Lasanble Nasyonal. En sonm R9.3milyon in ganny prozekte pour sa nouvo lotorite. Sa Prozedlwa pe adres en nouvo

kad legal pour sekter telekominikasyon e osi pou adres bann pratik anti konpetitiv.

En linisyativ ki sa nouvo lotorite pour travay lo la an 2023 i konsern enplimantasyon ‘*number portability*’ ki ava ed bann kliyan pou sanz zot operater e ava ede dan plis konpetisyon.

Mr Speaker, dan sa demars pou devlop lekonomi nimerik, enn bann sekter priyorite ki nou bezwen konsantre lo la, i lilizasyon teknolozi enformatik dan servis piblik.

I ankor annan retisans pou adopte teknolozi dan travay toulezour, me avek evolisyon, nou napa lot swa, me pou adapte. Nou pe depan bokou lo Departman Lenformasyon Teknolozi ek Kominikasyon dan sa demars, me nou rekonnet ki i pa pou kapab fer sa travay lo li menm. Alors Gouvernman in fer en provizyon R 6.5milyon pour met an plas en striktir ‘*outsourcing*’ lo devlopman sa bann proze.

Sekter Finansyel

Mr Speaker, Gouvernman pe kontinyen avek son langazman pou amelyor striktir ziridiksyon Anti-Blansisaz Larzan e pou Lit Kont Finansman Terorizm

(*AML/CFT*). Lafen Septanm sa lannen, Komite responsab pou amelyor kordinasyon nasyonal e asire ki bann defayans ki’n note dan ‘*Mutual Evaluation Report*’ i ganny adrese atan, in soumet en lot rapor ek *ESAAMLG* pou demann amelyorasyon dan ankor 8 *ratings* dan sa 11 defayans ki ti reste.

Sa demann pou ganny diskite dan *meeting ESAAMLG* an Avril 2023. Bann lankadreman ki konsern sa trwa lezot defayans pou ganny travay lo la pandan 2023 e Komite pou soumet son rapor kot *ESAAMLG* pour demann en amelyorasyon lo sa 3 *ratings* an 2024.

Mr Speaker, parey nou kapab konstate ki Sesel i lo ‘*Annex II*’ koni konman ‘*grey list*’ lalis Linyon Eropéen pour bann ziridiksyon ki pa korpore lo taks. Sa i akoz Linyon Eropéen pe esper Lorganizasyon pour Korporasyon Ekonomik ek Devlopman (*OECD*), vizit Sesel pou evalye lefikasite lankadreman lesanz lenformasyon taks.

Sa evalyasyon ki nou apel li en revi siplemanter in deza konmanse e *OECD* pou vizit Sesel an Desanm 2022 pou diskite avek Gouvernman, e osi

ek sekter prive bann progre ki'n ganny fer apre ki bann Lalwa in vin an fors. Sa prosedir pour konplete ler rapor Sesel i ganny diskite dan miting *OECD 'Peer Review Group'* an Zen 2023.

E nou ekspekte ki Linyon Eropéen i konsider sa rapor dan son revy an Oktob 2023.

Labank Santral pou asire ki lankadremans legal sistenm nasyonal pour peyman i baze lo bann standar enternasyonal e bann bon pratik. Lalwa sistenm nasyonal pour peyman e son bann regilasyon in ganny revwar, pou fer sir ki nouvo polisi pour adres sa bann defayans ki'n ganny idantifye i ganny adopte dan en lankadremans legal. Sa bann propozisyon dan polisi pou ganny diskite ek bann partener avan la fen 2023.

Mr Speaker, Labank Santral pe osi siport sa sekter avek bann nouvo Prozedlwa;- par egzanp *emoney* ki pour ogmant enklizyon finansyel par promot akse avek servis e prodwir finansyel abordab. Labank Santral pe osi amelyor lenfrastruktir sistenm peyman e '*central securities depository*' ki pour ofer plis sekirite e redwir okenn risk. Labank Santral i reste angaze dan son zefor pour moderniz sistenm nasyonal pour peyman, pour fer bann

fasilite peyman pli efikas, konvenyan, fyab e abordab.

An plis, avek bi pour ogmant itilizasyon prodwir e servis elektronik dan pei, Labank Santral avek led en konsiltan, pou antreprann en letid pou evalye afordabilite e fiabilite enternet e koneksyon rezo dan Sesel. Sa letid i ekspekte konmans an 2023.

Labank Santral pe osi travay lo en lankadremans pour formilasyon en '*Regulatory Sandbox*' lo nouvo teknolozi. Bann travayer pe osi fer lesanz konesans avek lezot pei dan preparasyon enplimantasyon sa teknolozi.

Mr Speaker, Labank Santral pe osi travay pou enplimant en nouvo *system 'Credit Information' (CIS)* ek son lankadremans legal pour kouver plis sekter. Sa i ava ed biznes annan lenformasyon konsernan kredi zot kliyan e zot ava kapab evalye si i vo lapenn donn en kliyan kredi, e osi ed zot deside konbyen pou sarze pour sa kredi, baze lo degre risk ki annan. Sa nouvo sistenm i ekspekte konplete an Desanm 2022 e son kad legal pou pare dan premye kar 2023.

Mr Speaker, Gouvernman pou osi inisye bann reform pour devlop marse kapital ki konparab avek norm

enternasyonal. Sa i ava en lot opsyon pour bann antite pret larzan. Nou pe analiz nou lankadreman legal e pour propoz lamannman pandan 2023.

Mr Speaker, bokou in ganny mansyonnen dan sekter finansyel. Me en defi ki touzour reste se Seselwa kalifye dan sa sekter. Avek en azanda tre sarze dan sa sekter i pou ouver bokou loportinite pour Seselwa e osi en sekter ki pey byen konpare avek lezot sekter. Alors mon oule enplor bann etidyan pou pran bann letid ki relye avek sekter finansyel e swazir bann karyer dan sa sekter.

Lenvestisman, Lantreprenarya, Lendistri e Fasilitasyon dan Komers

Mr Speaker, lenvestisman dan lenfrastruktir pour devlopman ekonomik i enportan. Pour lannen 2023, en alokasyon bidzeter R47.8 milyon pe fer pour Lotorite Endistriyel (IEA), pou finans 3 proze spesifik: kontinyasyon proze lenfrastruktir lo ‘zone 20’, nouvo faz proze lenfrastruktir lo ‘île Eve’ e osi nouvo proze lenfrastruktir pou ‘zone 6’ e park maren endistriyel.

An menm tan, nou bezwen osi asire ki nou bann polisi pe

promouvwar e fasilite komers dan nou pei. I pour sa rezon ki an 2022, Gouvernman pou konplet son premye revi polisi komers. E osi an 2022, Departman Komers ti devlop en nouvo platform “*Trade Portal*” pou kit sekter prive enformen avek lenformasyon nesese.

I enportan pou mansyonnen ki Department Komers dan son nouvo stratezi pour 2023, se pou vin pli konekte ek sekter prive e osi pli vizib par donn plis lenformasyon piblik lo bann travay ki pe fer. Nou rekonnet ki partisipasyon sekter prive dan devlopman Polisi, i vreman enportan e lakle sa transformasyon ekonomik ki nou anvi war.

Mr Speaker, an Fevriye 2023, prosedir permi pour enportasyon e eksportasyon pou vin ‘*fully digital*’. Nou ekspekte avek sa nouvo devlopman, nou ava ede donn en pli bon servis sekter prive. Gouvernman pe osi travay pou finaliz lalwa Propriyete Endistriyel (*Industry Property Act*), *Copyright Act*, e ‘*Trade Remedies*’ avan lafen 2023.

Minister Lenvestisman, Lantreprenarya e Lendistri, pe kontinyen pou priyoritiz son zefor lo amelyor lanvironnman biznes e kreasyon en

lankadreman lantreprenarya nasyonal. Depi Zilyet sa lannen en biznes i annan sa posibilite pou fer laplikasyon ou renouvelman en laysenns 'online'. Premye faz proze pou kree en 'portal' lenvestisman kot investiser i kapab soumet zot proze elektronik i dan staz teste. Gouvernman pe evalye opsyon lo en 'one stop service centre' avek bi fasilite prosedir ki bann biznes i fer fas avek.

Mr Speaker, amelyorasyon dan sistenm Ladwann (*ASYCUDA World*) i an progre. Sa sistenm pe ganny anbelir pou met nouvo 'modules'. Devlopman 'module' pour peyman elektronik in konmanse e nou ekspekte i konplete dan trwazyenm kar 2023.

'Excise Warehouse' module i ekspekte pare dan faz teste dan premye kar 2023. Devlopman platform 'single window' i ekspekte konplete premye kar 2024.

Komisyon Reveni pe kontinyen travay pou moderniz sistenm ki zot servi, pour nou vwar plis lefikasite dan koleksyon reveni. Sa sistenm i ekspekte konplete par lafen 2023. Sa modernizasyon dan sistenm, pou ogmant koleksyon reveni, donn plis servis

elektronik e redwir kou 'konformite' pour biznes.

Mr Speaker, Gouvernman pou revwar Lalwa Reveni pou ogmant zour ki en biznes i annan pour li anrezistre avek Komisyon Reveni apre ki sa biznes in konmans fonksyonnen. Sa pou sorti 14 zour pour vin 28 zour.

Gouvernman pou osi ogmant penalti ler en biznes pa fer son bann obligasyon parey Lalwa i demande. Sepandan nou rekonnet ki Lalwa Taks i pa enn ki sitan fasil pou konpran. Gouvernman pou travay lo en striktir pou asiste bann pti biznes, an term bann prosedir ki zot bezwen swiv, tel parey zot bann obligasyon taks, e bann lezot servis ki relye avek loperasyon zot biznes.

Komisyon Reveni pou osi evalye son bann program sansibilizasyon, pou etabli si sa bann program pe ede pour ki biznes i an konformite avek Lalwa Taks. Gouvernman in osi fer en alokasyon R5milyon pou skim 'seeds capital' pou siport bann 'startups' dan bann nide inovativ dan bann sekter priyoter.

Mr Speaker, Gouvernman pe met bokou lanfaz lo devlopman bann pti biznes. Anliny avek sa akse avek finans, i vin en priyoterite pour sa

Ladministrasyon. En alokasyon R50milyon pou sibvansyonn to lentera lo bann 'loan' 'Small and Medium Enterprise' (SME) ziska R3milyon. Bann nouvo paramet pour sa skim in ganny entrodwir pou fer sir ki I anliny avek vizyon Gouvernman, e met lanfaz dan bann sekter kle, ki pou ede dan sa transformasyon ekonomik, tel ki lagrikiltir, tourism, lapes ek lekonomi ble, ek sekter ICT, parmi lezot.

Anplis, tou biznes anba en reveni R10 milyon pou kapab kalifye en 'loan' anba sa skim baze lo zot proze, konpare avek avan ki ti R7 milyon. Alors mon demann sekter prive pou pran sa loportinite e vin ek bann proze inovatif pour ede dan sa transformasyon e anmenn plis larises pour nou pei.

Sekter Lanvironnman, Lenerzi e Sanzman Klima

Mr Speaker, Gouvernman i reste angaze pou akseler son lanbisyon dan tranzisyon lenerzi. Lenerzi renouvlab pou reste o sant stratezi ekonomik dan nou bann priyorite ekonomi, sosyal e sanzman klima, pour nou rekiper dan en fason soutenab apre sa pandemik e mentenir nou rezilyans. Nou langazman lonterm se pou redwir kantite

karbonn ver 2050 e pou ogmant zenerasyon elektrisite an servan lenerzi renouvlab ki enkli lenerzi.

Nou pe osi revwar lankadremman legal, Polisi e enstitisyonnel pour nou kree en lanvironnman favorab pou siport sa tranzisyon dan sekter lenerzi. Bann lenvestisman priyoriter dan adaptasyon sanzman klima, in ganny idantifye dan lenfrastruktir sekter tourism, amenazman lakot, sekirite alimanter, bio-diversite, e lekonomi ble.

En legzersis pou evalye bann proze priyoriter dan sekter sanzman klima in konmanse. Lerozyon, linondasyon e risk klimatik lo bann lakot in montre nou ki mannyer nou lanvironnman, nou bann resours ekonomik, e menm nou lavi sosyal i reste vilnerab e ki nou bezwen adres sa problem dan en fason serye.

Bann proze kle dan sa sekter i konm swivan ;

1. Proze lakot Anse Gaulette - R3milyon
2. Reabilitasyon lakot Anse Consolation - R1.5milyon
3. Amelyorasyon dan kapasite pour retir delo dan plato La Digue - R1milyon

4. Amenazman e lentegrasyon sistenm lakot - R8.8milyon

5. Proze ‘*Coral reefs*’ - R19.3milyon

6. Lenstalasyon bann pano soler PV lo twatir bann batiman Gouvernman - R27.5milyon e

7. Proze ‘*Low Carbon*’ pou adres sanzman klima - R7milyon

Sekter Transpor

Mr Speaker, Lazans Transpor Lo Later pe ganny en alokasyon R46.2milyon anba proze kapital. Sa sonm i enkli R3.9milyon pou amelyor semen sorti Larivyèr Anglez ziska “Ile Du Port”. En provizyon R3.5milyon pour trwazyenm koulwar Pwent Lari.

Gouvernman in osi resevwar en don pour en lavalèr R38.9milyon pou amelyor semen lakot was sorti dan krwaze semen Anse La Mous pou al Belazar. Sa proze i ekspekte konmanse avan lannen fini. Mr Speaker, travay pou devlopman proze lagrandisman por Viktorya i kontinyen an 2023. Lotorite Por Sesel in prozekte en depans R 86 milyon anver sa proze an 2023.

Lotorite Por i osi ekspekte konplet konstriksyon lenfrastruktir lo Zil ‘Eve’ ki pou enkli en lofis avek en depans total R4.2milyon ki’n ganny prozekte an 2023. Kontinyasyon travay lo Por Ladig in osi ganny prozekte dan depans 2023 par sa lotorite pour en sonm R9.7milyon.

Parey ti’n deza ganny anonse dan ladres Bidze oparavan, travay lo renovasyon terminal erport pou elev li lo en pli o standar ki ava reflekte nou standar destinasyon, koman en pei senk zetwal pe kontinyen ganny enplimante.

En total R9.1milyon in ganny prozekte pou ganny depanse an 2023 pour proze renovasyon terminal erport par Lotorite Lavyasyon Sivil (SCAA). Nouvo plan konpreansiv pour redevlopman Erport pou pare an 2023. En sonm R8milyon in bidzete an 2023 pour proze stasyon teste transport lo Pralen.

Pou note Mr Speaker, ki aprezan Komisyon Transpor lo Later in transfer pou tonm anba Minister Transpor.

Sekter Lanplwa

Mr Speaker, statistik pibliye dan dezyenm kar lannen 2022 in demontre ki in annan 4.5

poursan travayer an plis dan marse lanplwa, ki reprezant 51,214 travayer konpare avek 49,002 travayer a la fen Zen 2021. Pandan peryod Zanvyè a Septanm 2022, 927 endividi in ganny plase dan travay par seksyon servis lanplwa dan Minister.

Gouvernman pe finaliz stratezi devlopman resours imen. Sa stratezi pour anliny avek plan nasyonal pour devlopman. Sa stratezi ava ed bann etidyan lo zot desizyon lo zot letid baze lo ki kalite karyer ki pou an demann dan pei dan mwayen e long term.

En provizyon R6.5milyon e R5milyon i dan Bidze 2023 pour program devlopman skil, skim pour anploy bann zenn respektivman.

Mr Speaker, nou'n koz bokou lo Lalwa Lanplwa pandan sa bann dernyen lannen. Nou bezwen finaliz sa Lalwa pandan 2023.

Polisi ek Taks

Lentrodiksyon en taks lanvironnman soutenabilite lo bann viziter

Mr Speaker, ozordi Gouvernman i depans R 436.5milyon dan sekter lanvironnman e sanzman klima

ki enkli netwayaz e bann proze lanvironnman. Nou konstate ki touris pe vin pli konsyan dan proteksyon lanvironnman. Me nou rekonnèt avek viziter ki pe kontinyen ogmante, letan ou konpar li avek nou popilasyon i kapab annan en lenpak lo nou lanvironnman.

Alors nou bezwen regard bann lezot fason pour bann viziter kontribye ver soutenabilite nou resours natirel.

Mr Speaker, apartir le premye Avril, 2023, nou pou enplimant en nouvo 'levy' anba lalwa proteksyon lanvironnman ki pou ganny sarze lo bann touris ki vin vizit Sesel. Sa to pou ganny sarze pour sak nwit en viziter i reste Sesel konm swivan;

1. Bann pti lotel 24 lasanm e pli ba - en to R25 pour sak nwit pour sak lasanm

2. Bann mwayen lotel 25-50 lasanm - en to R75 pour sak nwit pour sak lasanm

3. Bann gran lotel par lao 50 lasanm - en to R 100 pour sak nwit pour sak lasanm

Nou pe enplimant sa 'levy' apartir Avril, pou donn ase notis bann operater dan sekter tourizm. Komisyon Reveni pou responsab pou kolekte sa reveni.

Sa nouvo 'levy' pou aplikab pour bann 'yacht charter' osi. Sa to ki noun propoze i pa signifikan pour enfliyans desizyon en touris pou vin Sesel. Nou ekspekte kolekte R162 milyon avek sa nouvo 'levy' an 2023.

Lentrodiksyon en taks lo reveni bann mwayen e gran lotel

Mr Speaker, menm si lendistri tourizm i premye pilye ekonomik nou pei, i toudmenm reste en tre gran problem an sa ki konsern poursantaz kontribisyon taks, sirtou biznes taks, ki zot bezwen 'file' tou-le-z-an avek Komisyon Reveni Sesel. En analiz ki ti ganny fer avek lasistans Lorganizasyon pour Korporasyon Ekonomik ek Devlopman (OECD) letan nou ti pe eksplor diferan opsyon lo reform dan rezim biznes taks nou ti war ki sekter tourizm i kontribye selman 8poursan reveni anba biznes taks konpare avek 47poursan anba reveni 'VAT' kolekte.

Dan sa 11 lotel ki tonm anba kategori gran biznes, savedir en reveni par lao R50 milyon, zot ti fer environ R4.75bilyon an reveni, me zot in pey selman R60.1milyon reveni anba biznes taks, ki reprezant selman 1.3poursan lo

zot reveni total. Parmi sa 11 gran lotel, selman 4 lotel, ki'n pey biznes taks an 2021.

Mr Speaker, sa letid in montre klerman, ki Gouvernman i bezwen kapab kolekte plis taks avek sa sekter. Menm si Lalwa pe ganny amande pou minimiz 'transfer pricing' ki pe arive dan sa sekter, me nou konstata ki bokou reveni pa pe ganny kolekte.

Alors apartir le premye Zanvyé 2023, Gouvernman pou enpoz en to taks 2poursan lo reveni bann mwayen e gran lotel. Sa rezim taks pour en nouvo Lalwa lo li menm. Nou prozekte nou pou kolekte R118milyon an 2023 avek lentrodiksyon sa nouvo rezim taks.

Revizyon to taks ki ganny sarze lo propriyete imobilye pour bann etranze

Mr Speaker, an Zanvyé 2020 Gouvernman ti entrodwir en to taks 0.25poursan lo propriyete imobilye ki aplikab lo tou propriyete rezidansyel etranze. I annan 819 propriyete ki'n anrezistre avek Lofis Rezistrar. Komisyon Reveni in kolekte R56.2milyon depi 2020 ziska Septanm 2022 anba taks

Propriyete Imobilye. Apartir Zanvyè, 2024, Gouvernman pou ogmant sa to taks pour ariv 0.5poursan. Avek sa lamannman, nou pou kolekte en reveni adisyonnèl R19.6milyon an 2024.

Revizyon to taks ki ganny sarze pour bann 'securities dealers' anba taks biznes

Mr Speaker, en kategori biznes dan sèkter finansyèl ki nou pe vwar plis krwasans se 'securities dealers', oubyen bann ki fer biznes avek 'stock exchange'. Ozordi dan Lalwa 'securities', to taks ki aplikab i 1.5poursan lo 'assessable income' si sa lakonpanyen i annan en prezans Sesel, baze lo bann kriter ki'n ganny mete.

Gouvernman pe finaliz bann kriter lo sa lankadremann prezans, pou fer sir ki i annan plis klarite e sa i ava ede dan devlopman sa sèkter. Nou konstate ki i annan plis ki 116 'securities dealers' ki'n etabli isi Sesel, e 15 ladan in pey anviron R71.5milyon. Alors Gouvernman pe ogmant to taks ki aplikab pour sa sèkter sorti 1.5 poursan pou ariv 3poursan konmansman Zanvyè 2023.

Avek sanzman lo to taks ki pou ariv 3poursan, Gouvernman pou kolekte

R219.5 milyon reveni adisyonnèl an 2023.

Lentrodiksyon en rezim spesyal pour sèkter 'fish processing' e akwakiltir anba taks biznes

Mr Speaker, depi ki sa Gouvernman in vin o pouvwar i pe koz lo transformasyon e diversifikasyon nou lekonomi. Nou byen kontan ki pour sa kantite letan sèkter tourizm in devlope e evolye pou vin kot i ete ozordi. Me, pandemik Covid-19 in montre nou ki mannyer sa lendistri i tre frazil e sa depandans ki nou'n annan tou sa letan, in fer ki bann lezot sèkter ekonomik in ganny neglizè.

I pour sa rezon ki nou pe met fondasyon pour lezot sèkter priyoriter ganny en pe lespas fiskal dan zot devlopman, par donn zot serten konsesyon, zis parey lendistri tourizm in benefisye avek. Enn sa bann sèkter priyorite i devlopman e evolasyon dan lapes, sirtou dan domenn 'valer azoute' e 'akwakiltir'.

Alor Mr Speaker, apartir le premye Zanvyè 2023, sa de sèkter pou pey selman en to taks biznes fiks '15 poursan' lo okenn profi ki zot fer. Sa i ava ed sa bann biznes pou investir plis e anmenn plis krwasans

dan lekonomi. Sa taks preferansyel lo sa de sekter i pour en dirasyon 10 an. Zis pou fer rapel ki depi Zanvye 2022, to taks biznes i konm swivan:

15 poursan lo profi ziska R1 milyon e 25 poursan lo profi par lao R1milyon. Pandan lannen 2023, nou pou evalye lezot sekter ki nou pou met sa to taks preferansyel. Sa i ava anonse dan Bidze 2024.

Revwar striktir 'VAT'

Mr Speaker, an Septanm 2022, Gouvernman ti ganny lasistans avek Fon Monneter Enternasyonal pou fer en evalyasyon dan striktir 'VAT' ki egziste Sesel. Sa evalyasyon in war ki VAT in perform byen dan perspektiv koleksyon reveni. Dapre analiz ki'n ganny fer, 35poursan 'bann mwayen e gran biznes' ki anrezistre pe kontribye plis ki 70poursan koleksyon VAT. Baze lo sa rapor, Gouvernman pou kontinyen travay avek IMF, pour ki nou;

1. Etabli en regroupman plizyer partener avek reprezantan diferan Minister, reprezantan sekter prive, avek bi pou adopte en stratezi pou adres defayans ki egziste dan lalwa e anmenn plis klarite.

2. Minister responsab pour Finans pou prepar en rapor lo reveni ki pe perdi lo bann egzanpsyon ki egziste ozordi. Sa rapor pou ganny prezante avek Liv Bidze pour lannen 2024.

Rediksyon to taks e striktir lo benefis ki anployer i donn son travay anba Lalwa Taks lo saler

Mr Speaker, pour lannen 2023, Gouvernman pe entrodwir plizyer diferan mezir ki pou benefisyé bann endividi, ki a permet zot avanse devan dan zot lavi personnel.

Premyerman nou pe reviz Katriyenm 'Schedule' dan Lalwa pour Taks lo Saler ek Benefis Non- Monneter. Sa 'Schedule' i donn en lalis serten benefis non-monneter ki en anplwaye i kapab gannyen dan kad son lanplwa, oubyen ki en asosye i kapab gannyen an relasyon avek son performans travay. Par egzanp bann benefis parey lakaz, manze kot travay, transportasyon e lezot ankor. En anplwaye i devret pey Komisyon Reveni en taks ekivalan 20poursan valer bann benefis non-monneter ki sa bann travayer in benefisyé.

Konmansman le premye Zanvye 2023 sa to taks pou

desann sorti 20poursan pou ariv 15 poursan.

(APPLAUSE)

MINISTER NAADIR HASSAN

Gouvernman in osi revwar sa lalis anba katriyenm ‘*Schedule*’ dan Lalwa Taks lo Saler ek Benefis Non-Monneteer pou met bann egzanpsyon adisyonnèl, savedir pou napa taks lo la. Sa nouvo lalis i konm swivan:

□ Provizyon manze pour bann travayer

□ Okenn depans medikal ki anplwayer i depanse lo en travayer. Sa i ava ankouraz anplwaye pou sipòrt zot travayer ler i bezwen bann servis medikal.

□ Okenn depans lo ledikasyon en zanfan son travayer ki anplwaye i depanse.

□ Depans transportasyon en travayer kot son travay apre retourn ek li kot lakaz

Mr Speaker, Gouvernman in revwar sa bann benefis sirtou bann ki annan en laspe pozitiv e direk pour nou bann travayer. Nou rekonnèt ki annan bokou anplwayer ki pe donn sa bann benefis, e nou ekspekte ki lezot osi a donn sa bann benefis ki dan lavantaz zot travayer.

Mr Speaker, nou pou revwar Lalwa Taks “*Income and*

Non-Monetary Benefits” pou fer ki okenn ‘*back pay*’ ki ganny peye pa pou ganny takse konmansman le premye Zanvyè 2023.

(APPLAUSE)

MINISTER NAADIR HASSAN

Sa i ava adres konsèrn avek bann travayer ki en taks pli o ti pe ganny aplike lo zot saler. E bokou fwa rezon sa ‘*back pay*’ pa lafot sa travayer.

Kiltir ek leritaz Nasyonal

Mr Speaker, lenvestisman dan nou kiltir ek leritaz Nasyonal i reste enportan pour nou Gouvernman. An 2022, nou’n konmans travay renovasyon lo sant kiltirel nasyonal. Sa proze i ekspekte konplete ver milye 2023. Enn fwa konplete i ava ganny servi non selman koman en sant aprantisaz pour nou popilasyon, me pou osi annan lofis pou Lenstiti kiltir ki ozordi pe depans omwen R15milyon dan kou lwe lofis.

En proze enportan ki pou konmansman en 2023, i konstriksyon ek larsiv nasyonal. Mr Speaker, i regretab ki ozordi nou napa en larsiv nasyonal ki gardyen nou bann dokiman istorik e

enportan. En sonm inisyal R5milyon pou konmans preparasyon pour sa batiman in ganny bidzete dan Bidze 2023.

Mr Speaker, osi an 2023, pou annan travay renovasyon lo de lezot batiman kiltir :

□ Teat de Palm – R 3 milyon

□ Batiman Karnegi – R 4.1 milyon

□ Lofis administrayon pour Lenstiti kiltir – R 6.4 milyon

Servis Piblik

Mr Speaker, en lot gran priyorite pour sa ladministrasyon, se pou develop en servis piblik ki efektif e performan. Sa reform pou enn ki pou pran letan, me nou determinen pou fer aköz lepep Seselwa i merit en servis piblik ki delivre pour zot. Kontinyen fer parey, i pa en opsyon e nou bezwen fer pli byen.

Sa misyon pou transform servis piblik pour ki i vin pli efikas e pli performan, i enportan e nesaser. Nou program *Result Based Management (RBM)*, i reste a la baz louvraz ki pe ganny fer pour amelyor servis piblik e sa pou

bezwen ganny enkilke dan tou travayer sekter piblik, depi sa ki pli ba, ziska sa ki pli o.

Koman en Gouvernman nou konsyan ki nivo satisfaksyon manm piblik avek servis ki zot gannyen avek travayer sekter piblik i pa alaoter. Alor ki mannyer ou ankouraz travay dir e efikasite, si travayer i konnen ki son bann reminerasyon i garanti, malgre i pe trenn lipye E pa pe performen. Nou devret pe rekonpans performans, ki al anliny avek travay dir, e menm ler ou fer plis ki ou ‘*job description*’ i demande.

Se sa, bann bon latitud ki nou devret pe ankouraze dan sekter piblik, non pa bann ki kale, me ekspekte ki otomatikman zot ganny rekonpanse. Alor Mr Speaker, dan sa reform, apard rekonpans baze lo performans, nou pe osi met bann lankadreman pou donn formasyon.

Premyerman nou pe donn formasyon dan kad nou program Kolez Servis Piblik, kot la en alokasyon R2.5milyon dan Bidze 2023 pour Biro Servis Piblik (*PSB*) travay konzwentman avek Lenstiti ‘*Guy Morel*’ pou donn formasyon nesaser nou sekter piblik.

Mr Speaker, Gouvernman pe ganny bokou sipor avek Gouvernman Emirat Arab Ini pour reform nou servis piblik. Sa sipor ki nou pe gannyen i gras a sa *MoU* ki le de Gouvernman ti sinyen pli boner sa lannen. Anba sa lagreman, Gouvernman pou entrodwir en program *'leadership'* pour son bann travayer ki dan pozisyon sinyor. En lot program se pou idantifye bann fitir dirizan e donn zot formasyon.

Fonksyon Biro Servis Piblik (*PSB*) pou sanze an 2023 kot i pou donn plis gidans, swivi, evalyasyon e odit. Bann Minister, Departman e Lazans pou pran sa rol pou zer resours imen e fonksyon administrativ baze lo zot plan stratezik.

Bann sekreter prensipal e sef egzekutif pou bezwen annan pli bon governans e en devwar pou rann kont. E sa i ava anmenn plis efikasite, e latransparans dan sekter piblik.

Mr Speaker, parey mon'n fer resorti o paravan ki Gouvernman pe pey tro bokou *'rent'*. An vi bann konplikasyon pou konstrir en *'Government House'*, Gouvernman pe aprezan eksplor bann lezot alternativ pou redwir kantite larzan ki i depanse dan *'rent'*.

Gouvernman pou kontinyen eksplor bann diferan opsyon pou konstrir bann lofis pour bann diferan antite Gouvernman. Travay in deza konmanse lo Sant Kiltirel Nasyonal ki pou sov nou anviron R15 milyon dan *'rent'* par an, an vi ki Lenstiti kiltir i eparpiye dan diferan lokasyon. Travay pe osi al konmans travay konstriksyon lo nouvo *HQ* Komisyon Reveni Sesel (*SRC*).

Mr Speaker, Gouvernman pandan lannen 2022 in revwar striktir *'Cleaners Corporative'*. Tou travayer ki anploye avek *'Cleaners Corporative'* pou ganny anploye avek zot Minister, Departman e Lazans, konmansman Zanvye 2024. Gouvernman in fer en alokasyon R 24.7 milyon pou pey zot konpansasyon ver la fen 2023.

Sa lannen, Gouvernman in osi konplet en evalyasyon endepandan lo servis sekirite dan Minister Gouvernman Lokal e Zafer Kominoter. En sonm R22.9milyon ti pe ganny depanse par lannen lo servis sekirite. Baze lo sa rapor, Gouvernman in deside pou anploy 84 zofisye sekirite pour en sonm anyel R9.6milyon e osi envestir dan bann lekipman sekirite.

Gouvernman avek sipor *IMF* pou antreprann en evalyasyon lo sistenm 'amenazman lenvestisman piblik'. Sa pou kouber bann pratik governans a tou nivo, devlopman ekonomik. Sa legzersis ava ede avek pli bon planifikasyon bann proze kapital e i a osi fer ki alokasyon pour lenvestisman i ganny fer dan bann sektè priyorite e ki lenplimantasyon bann proze a ganny enplimante efikas e dirab.

Mr Speaker, mon bezwen met lanfaz lo nouvo model peyman trezyenm mwan. Sa i sa sanzman kot tou travayer i ganny en trezyenm mwan, san ki zot performans i ganny evalye, konpare avek enn ki baze lo performans. Sa i sa sanzman fondamantal ki nou pe anmennen.

Nou bezwen realize ki sa ki travay dir i bezwen war en diferans dan son rekonpans, ki i gannyen. Ki mannyer nou pou ankouraz bon performans si sa ki travay dir i ganny menm rekonpans ki sa ki pe trenn lipye?

Mr Speaker i bezwen annan lazistis dan ki mannyer nou rekonpans nou bann travayer. Ankor la, sa administrasyon pa pou pran en

lapros popilis ki al kont bann prensip ki zis.

(APPLAUSE)

MINISTER NAADIR HASSAN

Mr Speaker, mon oule profite pou fer en lapel avek travayer sektè piblik pour zot vin pli profesyonnel, pli konsansye, e pli efikas dan zot travay, sirtou la ki zot pe al ganny en ogmantasyon saler an 2023, akòz ler evalyasyon performans i ganny fer, si ou pa alaoter, pou napa plas pour ou dan sa servis.

Gouvernans bann Lantrepriz Piblik

Mr Speaker, nou pe war rezilta striktir ki nou pe mete pour nou bann lantrepriz piblik. Lannen 2021, Gouvernman ti fer en alokasyon R 240.1 milyon e pour lannen 2022 sa i R272.8milyon pour sibvansyon bann lantrepriz piblik. Me an 2023 nou pe prozekte selman R 44.9milyon pour sa bann antite swivan;

- a. Servis Lapos – R6milyon
- b. Korperasyon Transpor Piblik (*SPTC*) - R3 6.9milyon
- c. Lenstiti 'Guy Morel' – R2milyon

Mr Speaker pandan lannen 2023 nou pou fer en odit gouvènanans e operasyonnel lo senk lantrepriz piblik. Dan premye faz ki nou ekspekte konplete par lafen Zen 2023, nou pou konsantre sa legzersis lo Korporasyon Litolite Piblik (*PUC*) e *Seychelles Petroleum Company (SEYPEC)*. Dezyenm faz sa legzersis pour konplete an Desanm 2023 i pou konsantre lo *Air Seychelles*, Lakonpanyen Devlopman bann Zil, e *Seychelles Trading Company Ltd (STC)*.

Mr Speaker en sonm R148.7milyon pe ganny prozekte anba bann don devlopman pour bann lantrepriz piblik;

- a. *SPTC* en alokasyon R3 5.9milyon
- b. *PUC* en alokasyon R60milyon
- c. *PMC* en alokasyon R52.8 milyon

En sonm R275.2milyon pou *PUC* anba '*Net Lending*' in osi ganny bidzete. Mr Speaker, lannen 2023 i osi ekspekte vwar lafen proze lagrandisman danm Lagog. En proze avek en kou konstruksyon plis ki R300milyon ki'n ganny finanse par en '*loan*' avek Labank Devlopman Afriken (*AFDB*).

Sa proze in eksperyans serten difikilte dan lenplimantasyon avek retar ki'n ganny rankontre an vi serten travay adisyonel ki'n bezwen ganny fer pou konplet proze. *PUC* pe enplimant proze desarz lo Ladig ki pe osi ganny finanse atraver en '*loan*' avek Labank Lenvestisman Eropeen (*EIB*) e Lazans Devlopman Franse (*AFD*) pandan lannen 2023. En total plis ki R42.8milyon in ganny prozekte pou ganny depanse dan sa proze an 2023.

Konklizyon

Mr Speaker, an konklizyon mon oule remersye Prezidan Ramkalawan pour son gidans e sipor dan sa transformasyon ki nou pe fer pour nou pei Sesel.

Mon osi remersye Vis-Prezidan e mon bann koleg Minis e zot lekip dan bann Minister, Departman e Lazans, pour zot sipor dan enplimantasyon Bidze 2022 e osi dan preparasyon Bidze 2023.

Mon remersye tou bann travayer dan Minister Finans, Planifikasyon Nasyonal e Komers e tou bann Lazans ki tonm anba mon portfolyo pour zot devouman, zot profesyonnalizm ek zot kontribisyon. Koman en lekip

nou pe transform lekonomi Sesel.

Mon remersye tou manm Lasanble Nasyonal, e ou osi, Mr Speaker pou sipor ki zot in aport mon Minister e Gouvernman pandan lannen 2022. Mon osi rekonnèt sipor sèkter prive ek sosyete sivil dan preparasyon Bidze 2023. Mersi pour zot langazman dan sa prosesis bidzeter.

Mon pli gran remersiman i al pour lepep Seselwa ...

(APPLAUSE)

MINISTER NAADIR HASSAN

... akòz pandan sa de dernyen lannen, zot in montre bokou rezilyans, perseverans, kouraz, e matirite. Kot zot in konsansye e konpran sa difikilte ekonomik ki nou pei ti pe pas atraver. Zot in demontre pasyans, e pare pou donn en koud mwen pou travay pour Sesel e tenir nou pei dan son moman pli difisil dan son listwar ekonomik.

Ozordi, 2an pli tar, tou sa bann bon karakter ek latitid ki zot in demontre dan sa parkour, pe raport rezilta. E nou koman en Gouvernman responsab, nou rekonnèt zot partisipasyon pozitiv dan sa reisit ekonomik.

Mr Speaker, sa ki monn prezante i montre ki mannyer

sa Gouvernman ozordi pe travay dan en fason konsansye pour son pep, e tou benefis posib i retourn ver son pep.

(APPLAUSE)

MINISTER NAADIR HASSAN

Letan nou tou nou fer plis zefor e koste, e montre pli gran solidarite, nou pou kree plis larises e se nou pep, e sak zanfan Sesel ki pou benefisye.

Seselwa annou leve e travay pour nou prop byennet, fanmir, kominote ek nou pei. Sa se nou pei e Sesel pe kont lo nou, annou fer li pour Sesel!

Avek Sa, Mr Speaker, mon rekomande ki sa, “*Appropriation Bill 2023*” pou en Bidze R10,495,149,665 pou otoriz depans dan ‘*Consolidated Fund*’ pour lannen.

Mersi Mr Speaker.

(APPLAUSE)

MR SPEAKER

Mersi Minister Naadir Hassan pou ou ladres, non selman pou bann parol e lenformasyon ki ou’n partaze, me sirtou pou la kantite travay ki i reprezante. E mon asire remersiman i al pou ou e osi pou lezot manm ou *staff* dan Minister Finans e

bann ki an personn ozordi isi – Mr Patrick Payet, Ms Astride Tamatave, Mr Jude Commettant, e Mr Dick Labonte, mon prezan mon remersiman an personn.

(APPLAUSE)

MR SPEAKER

Parey Manm i okouran repons lo Bidze pou komanse le 10 Novanm 9er bomaten e mon asire bann Manm pou war sa avek bokou antisipasyon.

Avan mon termin Lasanble e swet orevwar bann Minis mon pou permet *Leader* Lopozisyon detrwa mo pou adres size ki nou'n adrese depi o komansman Lasanble bomaten. Onorab Pillay mon a les ou laparol.

HON SEBASTIEN PILLAY

Mersi Mr Speaker. Bonzour Minis ek ou delegasyon, bonzour tou koleg Onorab. Mr Speaker mon oule zis zwenn avek nou popilasyon e tou dimoun ki'n atriste pou aprann lanmour Kaptenn Nicole Chang-Leng.

Mon krwar lo nou kote e sirtou mwan menm mwan koman en papa ki annan 2 fiy, bann madanm ki'n akonpli bokou dan nou sosyete i toultan

en lespirasyon pou bann zenerasyon ki pe vini.

E mon rapel tre byen ler televizyon ti montre sa vol ki avyon *Air Seychelles* ti fer avek zis sa crew madanm e zot ti apoz sa avyon. E bokou dimoun ti enpresyonnen si oule avek sa lakonplisman ki en madanm – en zenn madanm dan nou pei ti kapab akonpli.

E mon krwar sa in osi ede pou ankouraz lezot madanm pou antre dan en *area* parey ou dir dan en karyer ki bokou dimoun pa'n fer. Mon'n osi ekout Minis bomaten kot in mansyonn sa staff Minister Finans.

Mon krwar Mr Speaker, en keksoz ki mon ti a kontan pas avek nou koman en Nasyon, se ki petet annou sey fer plis pou nou kapab valoriz oubyen apresye kontribisyon, ki tou dimoun i fer ler zot la, akoz ler zot kit nou parfwa nou pa ganny sans pou nou fer li.

Mon swete Mr Speaker, ki lafanmir i a ganny konsolasyon ki nou tou en popilasyon zeneral pe anmennen e mon demann bann zenn fiy dan sosyete – bann madanm pou pran legzanp lo bann madanm ki – i annan bann manm Lasanble ki madanm e bann madanm ki ankor pe montre zot devouman, dan zot travay ver

zot karyer, pou pran sa koman en lankourazman pou zot osi akonpli bokou plis. Mersi Mr Speaker.

MR SPEAKER

Mersi Leader Lopozisyon. Bon avek sa mon remersye Minis ek son delegasyon pou zot partisipasyon ozordi e bann Manm pou zot latansyon. Lasanble i ava *adjourn* e mon a rapel Komite Biznes Lasanble pou zwenn avek Sekreter Deta Patrick Payet – nou a fer li 11.45 pou konsiderasyon program lo travay Komite lo Bidze. *Adjourn*.

(ADJOURNMENT)